


楚紀

四十九

十五




登績

漢書門	類	號	函	架	冊
六	五	三	八	四	二

漢書	類	號	冊	架
八	五	三	八	二

內閣文庫	漢	8853
冊數	29	(15)
函號	286	168



綴じ部(喉部分)の文字など開きが不鮮明な箇所あり



楚紀卷之四十九

請賜進士

經筵日講同修 國史奉直大夫前翰林院侍講學士臣廖道南謹撰

楚紀卷之四十九

登績內紀前篇

粵稽諸古唐虞肇基百工維和庶績咸熙明試  
有功考課以時夏商官倍用此攸宜越若周邦  
立政諸司孤卿寅亮侯牧保釐漢制近古循良  
可稽唐典紹灋善氣不渝宋分諸道亦克嗣徽  
肆若我

明式于九圍浚采邦家兢業時幾秉銓懸鑑陟明永  
祈撰登績內紀前篇

登績內紀前篇

蕭育

徐璆

周康

樂巴 召信臣

郭賀

第五頌

蕭育字次君東海蘭陵人太傅蕭望之之子也少以父  
 任為太子庶子元帝即位起為御史除功曹遷謁  
 者使匈奴還為茂陵令課畝居前後坐失大將軍  
 意免官復為中郎將使匈奴歷青冀二州刺史長  
 水校尉泰山太守入守太鴻臚轉右扶風哀帝時  
 南郡江中多盜拜南郡太守策曰南郡盜賊群輩  
 為害朕甚憂之以公威信素著故委為太守其為  
 民去害以安元元亡拘于小文加賜黃金一十斤  
 育至郡盜賊靜以病去官復起為光祿大夫執金

吾以壽終策由字子驕為安平太守治郡有聲  
 帝為定陶王時失其指免官復起為左輔都尉轉  
 江夏太守平江賊成重等有功增秩為陳留太守  
 元始中徵為大鴻臚嗣是母將隆字君房與育同  
 郡自沛郡都尉遷南郡太守王莽時徙合浦李尚  
 亦為南郡太守為孫寶所糾下獄  
 召信臣字翁歸壽春人以明經甲科為郎補陽穀及  
 上蔡長超遷零陵太守其治視民如子好為興利  
 躬耕勸農出入阡陌止舍鄉亭時行視郡中水泉  
 開通溝瀆起水門廣隄既蓄積有餘民獲其利作

均水約東刻石田畔以防紛爭禁止奢靡務出儉約戶口日增盜賊息屏號曰召父荊州刺史表其治績賜黃金四十斤移河南太守元帝竟寧中徵為少府列諸九卿奏請上林離宮勿復繕治減免諸黃門優劇及御圃不時之植信臣年耄卒於官平帝元始四年詔郡中立祠祀之

衛諷字子產河內人家貧好學王莽時仕歷州宰建武二年除襄城令遷桂陽太守郡舊不知禮諷下車修庠序之教設婚姻之儀暮年邦人從化先是武帝平含涯瀆陽曲江屬之桂陽民居深山濱溪

谷習其風土不供王賦諷乃鑿山通道列亭傳置郵驛後省勞息奸吏杜絕山多產鐵亡命私鑄諷乃起立鐵官歲多增入理郵民事居官如家其設施合于物宜二十五年徵還光武欲以為少府被疾不能拜勅以桂陽太守歸家賜錢十萬卒嗣後南陽茨充字子河代諷為桂陽太守亦善其政教民種殖桑柘麻紵勸令養蠶織屨民獲利益張機為長沙太守民多疾疫製藥投之全活甚廣

許荆字少張會稽人少為郡吏舉孝廉和帝時遷桂陽太守郡濱南州風物脆薄不識學義荆為設喪

紀婚姻制度俾知禮禁嘗行春至耒陽有將均者  
兄弟爭財互訟荆嘆曰吾荷國重任教化不行咎  
在太守乃使更部尚書陳狀均感悔在任十二年  
父老稱歌徵拜諫議大夫卒於官桂陽立廟樹碑  
孫馘後為太尉有王寵者守荆州鑿蠻水與木里  
溝溉田甚袤胡烈亦守襄陽築堤扞水百姓歌之  
陸康字季寧吳郡人祖續父褒俱有名康少負毅烈  
舉茂才除高城令光和元年遷武陵太守轉守桂  
陽所在稱之時靈帝欲鑄銅人康上疏諫不聽內  
侍譖之檻車徵逮待御史劉岱為白其枉釋之會

廬江賊黃穰等與江夏蠻連結攻沒四邑拜廬江  
太守帝嘉其功官其孫尚為郎中後死于孫策之  
難

樂巴字叔元內黃人初補黃門令出為郎中遷桂陽  
太守以郡處南垂不開典訓乃定婚喪禮儀興學  
校獎進之雖幹吏胥史咸課令習讀程試殿取隨  
能除授政事明察規事七年荆州刺史李固表之  
徵拜議郎守光祿大夫與杜喬周舉八使徇行郡  
國後死黨錮之難子賀官至雲中守

郭賀字喬卿頌陽人建武中為尚書令曉習政事多

所匡益拜荊州刺史引見寵異到官有殊政百姓  
歌之曰厥德仁明郭喬卿忠正朝廷上下平顯宗  
至南陽特見嗟嘆賜以三公服黼黻冕旒勅行部  
去檐帷令人見其容服以章有德永平四年徵拜  
河南尹在官三年卒賜車一乘錢四十萬

頡字子陵京兆人第五倫之子也倫初為武岡  
扶夷長未至擢會稽太守入代年融為司空元和  
三年策免頡嗣拜桂陽太守轉廬江南陽所在見  
稱入為太中大夫仕至將作大匠

徐璆字孟玉廣陵人少博學辟公府舉高第遷荊州  
刺史時董太后姊子張忠守南陽汙濫璆當之部  
太后遣中常侍屬忠璆曰臣身為國不敢聞命太  
后怒徵忠為司隸校尉璆到州舉奏忠賊億萬及  
五郡太守不法悉案其罪威風大行中華元年同  
中郎將朱雋擊黃巾賊張忠構之免官再起汝南  
太守獻帝時以廷尉徵中道為袁術所扼後拜太  
常有楊璆者肇築柳城殊有治績張羨亦為永州  
太守甚得江漢間心

周璟字君光徐州下邳人舉孝廉為郴州太守郡接  
南海自暴亭至曲江水勢險迅行旅號跳璟開六

龍以合真水泄其勢郡人便之立祠樹碑先是有  
周嘉者字惠文為永州太守百姓思其遺愛立祠  
祀之

史南曰虞廷咨四岳而牧伯熙厥績其績也凝  
焉周官馭八柄而冢宰奏厥功其功也崇焉秦  
易守令漢綜循良以刺史司州牧以太守綰郡  
符遣使徇行則繡斧明威樹侯列藩屏則茅土  
分錫其制猶為近古楚自高祖分南郡為臨江  
郡統縣十有八江夏郡統縣十有五桂陽郡統  
縣十有一武陵郡統縣十有四零陵郡統縣十

以荆州刺史率之至光武起春陵則又置南陽  
郡統三十七城南郡統十七城長沙統十三城  
而武陵零陵江夏桂陽則仍其舊咸屬之于荆  
州刺史是故蕭育牧南郡召信臣守零陵衛諷  
長桂陽而許荆陸康樂巴較若畫一郭賀靖荆  
州而第五頡徐璆周璟各奏爾能漢治之近古  
也不猶有三代之遺風乎贊曰西漢肇創淳大  
龐洪東漢恢復明作有功諸臣循良穆有古風  
蕭召衛許同賞協恭陸樂郭徐照媪和雖頡璟  
供職亦有治功

楊震 李固

楊震字伯起華陽人少好學稱爲關西夫子客居湖  
城不應辟召年近五十有冠雀啣三鱸子講堂諸  
生進曰先生自此升矣此卿大夫三台象也大將  
軍鄧騭聞其賢舉茂才四遷至荊州刺史屢彰政  
績改東萊守道經昌邑時令王密乃前荊州所舉  
茂才也夜懷金十斤遺之震曰故人知君君何不  
知故人密曰暮夜無知震曰天知地知子知我知  
何謂無知密愧而去轉守涿州安帝元初四年徵  
爲太僕遷太常永寧元年代劉愷爲司徒鄧太后

薨乳母王聖出入宮掖爲姦震上疏極諫帝不納  
二年爲太尉中常侍樊豐周廣謝暉更相扇動地  
震京師震因言地宜安靜土位中宮此中官持權  
用事之象語在震傳大將軍耿寶誣震怨望詔遣  
歸本郡行至夕陽亭飲醪而卒弘農守承樊豐意  
停棺道側歲餘順帝即位震門生虞放陳翼上書  
雪之詔改葬于童亭有大鳥高丈餘悲鳴帝感震  
忠以中牢祀之震五子長子牧爲富波相仲子秉  
爲荊州刺史初震之被譖也門人高舒亦獲譖及  
事明拜侍御史遷荊州刺史



李固字子堅南鄭人司徒郃之子也順帝陽嘉二年  
地震山虧公卿舉固對策固上疏極論帝覽其奏  
異之命為議郎諸常侍及阿母疾之出為廣漢  
令至白水關解印綬不仕梁商請為從事中郎永  
和中荆南盜起復召固為荊州刺史固到郡遣使  
勞問境內赦其舊讐與之更始賊帥夏密等歛其  
魁黨六百餘人自縛歸首固皆原之遣還使自相  
招集開示威法十歲間餘黨悉降州內清宴時南  
陽太守高賜為固所糾納賂梁冀固持之愈急冀  
遂改固為太山太守滿歲遷將作大匠上疏論事  
語在固傳冲帝即位以固為太尉質帝立梁冀嫉  
之飛章誣固賴太后持之獲免固與杜喬同心秉  
政及帝遇毒復共立清河王蒜梁冀忌其威明誣  
固與謀矯詔誅之臨刑與胡廣趙戒戒得書流涕  
戒成都人舉孝廉為荊州刺史葬固二子死獄少  
子燮變姓名入徐賣卜後徵拜議郎靈帝時為安  
平相遷河南尹

史南曰楊伯起負特立之資屢進讜言宦寺褫  
魄李子堅抱邁往之志戚畹含憤卒之停柩都  
亭神鳥感異暴尸京邑義士吞聲人之云亡邦

國殄瘁悲夫是故君子之用世惟其時而已時  
可以仕則行春布令不害為良吏時可以死則  
顯天俟命不失為忠臣是故並錄之以昭厥績  
云爾贊曰可仕則仕澤貴及民可死則死忠貴  
安身震之忠懼石鳥感靈固之清貞烈士吞聲  
石渠蘭室史有餘馨

馬援

宋均

度尚

陳球

杭徐

馬援字文淵茂陵人初遇光武一見如故語在援傳  
拜太中大夫京州平遠隴西太守擊先零于臨洮  
徵入為虎賁中郎將征交趾封伏波將軍新息侯

建武二十四年武威將軍劉尚擊武陵蠻敗績援  
時年六十二請行帝老之援據鞍被甲上馬以示  
可用帝笑曰嬰鑠哉是翁也遂遣援率中郎將耿  
舒劉匡孫永等將十二郡募士及弛刑徒四萬餘  
人征五溪明年諸軍至臨鄉遇賊攻縣援迎擊破  
之斬獲二千餘人散走竹林中初軍次下雋有兩  
道可入從壺頭則路迫而水嶮從克則塗夷而運  
遠帝初以為疑及軍至耿舒欲從克援以為棄曰  
費糧不如從壺頭搃其喉咽克賊自破以事上之  
帝從援策三月進營壺頭賊乘高守隘水疾船不

得上會暑盛士卒多疫死遂困乃穿岸為屋以避暑賊升險鼓譟援徹曳足以觀之左右哀其意皆為流涕耿舒與兄好時侯弇書以援不用其策遂致失利弇得其書奏之帝遣中郎將梁松代之會援病卒松宿懷憤因言加譖帝大怒收新息侯印綬初援遺書戒其子弟寧為龍伯高之刺鵠類驚毋為杜季良之畫虎類狗季良事連梁松以故憾之伯高亦繇此為零陵太守後雲陽令朱勃詣闕上書訟援之功始得歸葬章帝建初三年追謚曰忠成長子廖封順陽侯孫遵程鄉侯曾孫度潁陽

侯次子防翟鄉侯今湖南有新息侯祠

宋均字叔庠南陽人以父任為郎年十五受業博士二十餘補辰陽長俗好鬼鮮學均為立學宮禁淫祀人皆安之以祖母服歸客潁川會武陵蠻反劉尚敗沒詔均乘傳發江夏奔命三千人援之適馬援至因令均監軍與諸將並進賊拒扼不得前及援卒軍士多溫涇死者大平均與諸將議曰道遠士病不可以戰忠臣出境有可以安國家者專之可也乃矯制調伏波司馬呂种等守沅陵長命种奉詔入虜營告以恩信因勒兵隨其後遣歸本

郡為置長吏而還均先自劾矯制罪光武嘉其功  
賜以金帛令過家上冢每有四方異議數訪問焉  
遷上蔡令轉九江守虎北渡河蝗飛出界明帝永  
平元年擢東海相七年徵拜尚書令司隸校尉數  
月出為河內大守教化太行以疾上書上命官其  
子條為太子舍人

度尚字博平山陽人初由中官侯覽上計拜郎中除  
上虞長為政嚴峻發擿姦非人稱神明轉文安令  
桓帝延熹五年長沙零陵寇大起交阯刺史蒼梧  
太守望風遁遣御史中丞盛修募兵討之不克賊

兵燒長沙又遣謁者馬睦督荊州刺史劉度擊之  
敗績桓帝詔舉任代尚書朱穆舉尚自右校令擢  
荊州刺史尚躬率部曲與同勞逸廣募雜夷明設  
購賞進擊大敗之降者數萬人桂陽渠帥卜陽潘  
鴻等畏尚威烈徙入山谷尚窮追之破其屯聚申  
令軍中恣聽射獵兵士喜方從禽尚密遣人焚營  
深自咎責衆益憤踊秣馬蓐食徑赴賊屯遂大破  
之尚出兵三年群寇悉定以功封右鄉侯遷桂陽  
太守八年徵還京師時荊州兵朱蓋等征戍日久  
忿恚復作與桂陽賊胡蘭等三千餘人攻郡邑太

守任胤棄城走零陵太守陳球固守拒之於是  
尚為中郎將率幽冀烏桓步騎救球又與長沙太  
守杭徐等發諸郡兵討之斬蘭等三千五百級詔  
賜尚錢百萬復以尚為荊州刺史延熹九年卒于  
官有董宣者為江夏太守平劇賊夏喜等事見酷  
吏傳

陳球字伯真淮浦人父豐廣漢太守球陽嘉中舉孝  
廉除繁陽令辟公府舉高第拜侍御史是時桂陽  
黠賊李研等陸梁太尉楊秉表球為零陵太守球  
設方略暮月解散適州兵朱蓋亂轉攻零陵郡郡

苦卑陘編木為城不可守備掾史白徙家避難球  
怒曰太守分國虎符受任一邦豈顧妻孥而沮國  
威重乎乃悉老弱死守弦木為弓羽子為矢引機  
發之射千餘步賊激水灌城球因地勢決水反滄  
相拒不下會中郎將度尚至球募士共擊破之上  
命賜錢五十萬拜子一人為郎遷魏郡太守徵拜  
將作大匠陟廷尉司隸校尉進太尉與司徒劉郃  
謀誅宦官曹節等不克下獄死子瑀吳郡太守琮  
汝陰太守珪沛相有陳奉者為武陵太守永昌中  
五溪蠻叛奉擊破之蠻夷畏服

杭徐字伯徐丹陽人鄉邦稱其膽智初試宣城長為  
 移深林遠藪推髻鳥語之人置縣下境內無復盜  
 賊後為中郎將宗資別部擊泰山賊孫舉等平之  
 封東鄉後及為長沙太守宿寇皆平卒于官桓帝  
 時詔增封千戶侯

史南曰臣攷郡志止書伏波及梁松龍伯高宋  
 均度尚諸人而陳球杭徐不少見焉夫伏波載  
 在盟府宋均度尚紀諸國史而球徐之功亦不  
 可誣也若夫梁松馮寵靈以肆讒董宣恣酷吏  
 以行霍雖有他功安足贖乎贊曰伏波人豪嗣

柱標功老猶嬰鑠哲不忘忠壺頭瘡霧遑恤厥

躬宋均請變撫綏疲瘵虎北渡河蝗飛墮空度

尚適奸倬有成功球徐協力敷奏爾庸

馮緄 法雄 楊璇

馮緄字鴻卿宕渠人少學春秋司馬法舉孝廉去遷  
 為廣漢都尉拜御史中丞順帝時持節督揚州諸  
 軍事遷隴州遼東二郡太守徵拜京兆尹司隸校  
 尉所在立威遷廷尉時長沙蠻寇益陽延熹五年  
 衆轉盛而零陵蠻相為內應武陵蠻悉掠江陵間  
 荊州刺史劉度南郡太守李肅並遁走荆南皆沒

於是拜緄為車騎將軍將兵十餘萬討之策曰蠻夷猾夏久不討攝各焚都城將軍素有威猛擢率六師前代陳湯馮博之徒以寡擊衆郅支夜郎樓蘭之戎頭懸都街衛霍北征功列金石將軍所究覽也今非將軍誰與修復出郊之事不復內御已命有司祖于國門詩不云乎進厥虎臣闕如彪虎將軍其勉之時海內饑饉帑藏空虛出征伐常減公卿俸祿假王侯租賦緄性烈直不行賄賂乃上疏曰勢淖容奸伯夷可疑苟曰無猜盜跖可信願請中常侍一人監軍尚書朱穆言其失體緄至長

沙賊悉詣營道乞降進擊武陵蠻斬首四千餘級受降十餘萬人荊州平詔賜錢一億固讓不受振旅還京師推功于中郎應奉薦為司隸校尉上書乞骸骨不許監軍張敞奏其刻石江陵傳婢自隨不寃會長沙賊復叛策免頃之復拜將作大匠轉河南尹徵為廷尉卒

法雄字文疆扶風郿人初仕郡工曹除平氏長擢宛陵令永初二年征海寇張伯路等轉青州刺史平東萊寇有功遷南郡太守斷獄省少戶口益增郡濱帶江沔有雲夢數澤多虎狼雄乃移書曰凡虎

狼之在山林猶人之居城市者至化之世猛獸不  
擾皆由恩信寬澤仁及飛走太守雖不德敢忘斯  
義其毀檻阱破機械勿妄捕山林是後虎害頓息  
人以獲安子真見逸人傳

楊璇字機平會稽人舉孝廉靈帝時為零陵太守是  
時蒼梧桂陽寇起吏人恐懼璇乃制馬車數十乘  
以排囊盛石灰繫布索于馬尾又為兵車專設弓  
弩尅期會戰乃令馬軍居前順風鼓灰賊不得視  
因以灰燒布馬驚奔突賊陣後車弓弩亂發鉦鼓  
鳴震群盜破駭梟其渠帥境內以寧荆州刺史趙  
凱誣璇妄有其功檻車徵逮乃噬臂血書詣闕上  
之詔原璇拜議郎三遷為渤海太守張溫薦之拜  
尚書僕射先是有胡爽者桓帝時為江陵主簿時  
武陵蠻亂江陵太守李肅棄城走爽力諫被殺  
史南曰臣攷諸漢書自伏波壺頭之後溪蠻紛  
起峒酋嘯聚馮緄持虎符以督率奮鷹揚以宣  
威在師中吉王三錫命信有之矣乃若法雄牧  
南郡毀檻而虎徙渡河楊璇守零陵設機而馬  
驚衝陣皆異績也贊曰先武開基宅中圖大伏  
波南征無遠弗届沿至末季南蠻肆害馮緄持



節法雄破械揚璇奔馬宣威敵愾

應奉、應詹

應奉字世叔南頓人祖疊江夏太守父郴武陵太守  
 奉少聰警讀書五行俱下為郡決曹史著漢書多  
 所述載舉茂才永興元年遷武陵太守蠻酋詹山  
 等四千餘黨叛執縣令奉到官山等皆降於是興  
 學校舉側陋政稱變俗坐事免延熹中蠻復亂馮  
 緄以奉有威請與俱拜從事中郎詔曰蠻夷叛逆  
 積惡放恣釜中之魚火熾湯蓋爾奉昔守南土威  
 名播越故復式序爾其勉之奉勤設方略賊破鯤  
 推功于奉薦為司隸校尉上書論官闕事桓帝納  
 之及黨錮起奉引疾自退追愍屈原著離騷三十  
 篇子邵字仲遠有雋才為車騎將軍邵弟珣珣子  
 瑒世茂才名先是有李進者順帝時為武陵太守  
 為政有體蠻徼安之

應詹字思遠奉之裔也魏初辟公府為太子舍人遷  
 南平太守王澄為荊州假詹督南平天門武陵三  
 郡軍事谿蠻並反詹討降之時政令不一諸蠻缺  
 望並謀背叛詹召蠻酋破銅券與盟由是懷綏數  
 郡無虞海內大亂詹境獨全百姓歌之山簡復假

詹督五郡軍事會蜀賊杜疇作亂來攻詹力戰摧  
之尋與陶侃破杜瓌於長沙賊巢金寶溢目詹悉  
無所取唯收圖書元帝假詹建武將軍監巴東五  
郡軍事賜爵隸陽侯陳郡王冲擁衆荊州素服詹  
名迎為刺史詹以冲等無賴棄還南平冲亦不怨  
其得人情如此後還益州刺史領巴東監軍

史南曰臣幼誦文選見應瑒百一之詩及與滿

公琰岑長瑜諸書所謂結春芳以崇佩折若華

以翳日其所從來遠矣及攻漢書則嘉世叔之

功晉史則羨思遠之畧前有所創後有所承應

氏其不朽乎贊曰世叔在漢征蠻揚勳思遠在

晉靖寇著名休連于中藻思若雲盈篇累牘璜

璩續紛誰其紹之大雅不群

李孝恭

李元則

李石

李從海

李宗閔

李孝恭唐西平懷王之次子也少沉敏有識量高祖

登極拜山南招尉大使初蕭銑據江陵孝恭獻策

圖之帝嘉納會李靖使江南孝恭倚其謀蓋召巴

蜀子弟圖江陵俄進荆湘道總管統水陸十二軍

發夷陵破銑於恭曰銑之境南際嶺表左薄洞庭

地險士衆若城未拔而援至我且有內外虞舟雖  
多何所用之於是縱戰艦放江中援兵至巴陵見  
舟疑阻銑內外絕遂降帝悅遷荊州大總管孝恭  
治荆置屯田立銅冶百姓利之轉襄州道行臺左  
僕射時嶺南未平乃分遣使綏緝其款附者四十  
九州唐之威令暢南嶠矣命討輔公柘忽柘水變  
為血衆皆失色孝恭自如卒破之江南平璽書褒  
美進東南道行臺左僕射孝恭雖宗室寬恕退讓  
無矜伐色太宗益親重之封河間王卒贈司空李  
讓代為荊州都督政務清靜嶺南酋豪數相攻遣

諭威德皆如約封漢陽郡王

李復字初陽宗正卿齊物之子也齊物字道用以宗  
室為河南尹貶竟陵太守復任蔭江陵司錄參軍  
衛伯玉才之表為江陵令李希烈叛荆南節度使  
張伯儀數為賊窘朝廷以復在江陵得士心奪母  
喪起為少尹充行軍司馬佐伯儀討之貞元十年  
以復為檢校尚書加僕射卒贈司定謚曰昭  
李嵩孝節之曾孫也始為枝江丞時張柬之為荊州  
長史稱之曰帝宗千里駒吾得其人矣累擢衛尉  
卿為太子少傅封武都伯又有李必文者武德九

年為蒲圻令始遷縣治于鳳山監地

李元則字彞唐高祖之子也初為澧州刺史折節厲行卒贈荊州大都督

李石字中玉襄邑恭王神符五世孫也元和中進士遷給事中進戶部侍郎判度支石器雄遠當軸秉權亡所撓是時宦寺氣盛每對延英殿而仇士良等願指氣使以折大臣石徐謂曰亂京師者李訓鄭注也三年正月出為荆南節度使召拜同中書門下平章事以身徇國不恤近倖仇士良疾之將加害帝知其然詔以太子少傅分司東都俄檢校

吏部尚書卒

李臣字表程神符五世孫擢進士宏辭賦日五色造語警拔士流推之調監田尉遷監察御史召拜翰林學士再遷司勳員外郎爵渭源男凡學士入署常視日影為侯程性嬾日過八磚乃至時號八磚學士元和三年出為隨州刺史以能政稱賜金紫服李夷簡鎮西川辟成都少尹以兵部郎中入知制誥韓弘為都統命程宣慰汴州歷御史中丞鄂岳觀察使還為吏部侍郎敬宗初召拜同中書門下平章事在鄂時韓愈贈之詩曰故人辭禮闈旌

節鎮江圻其度亦可想矣

李峴吳王恪孫也折節下士長於吏治天寶間累遷京兆尹出為零陵太守峴為政得人心尋徙長沙永王為江陵大都督假峴為長史肅宗召拜扶風太守兼御史大夫明年擢京兆尹封梁國公代宗立改荆南節度使入為禮部尚書兼宗正卿罷為太子詹事遷吏部尚書

李從誨神符孫也寶曆初進士擢太常博士甘露之變李孝本誅從誨以族昆弟貶朗州司戶參軍後歷山南西道節度使

李夷簡字易之鄭惠王元懿四世孫初補鄭丞中拔萃科調藍田尉授監察御史坐累遷虔州司戶參軍九歲復為殿中侍御史元和間為御史中丞京兆尹楊憑始為江南觀察使冒沒于財夷簡為屬刺史不為憑所禮至是發其貪憑貶臨賀尉夷簡賜金紫以戶部侍郎判度支俄檢校禮部尚書山南東道節度使初貞元時取江西兵五百戍襄陽制蔡右脅仰給度支亡死略盡而歲取貲不置夷簡奏罷之十三年召為御史大夫拜同中書門下平章事

李宗閔字損之元懿四世孫擢進士調華州叅軍事授監察御史禮部員外郎裴度伐蔡引為判官蔡平遷為部郎中知制誥穆宗即位進中書舍人大和中以吏部侍郎同中書門下平章事久之李德裕為相與宗閔共當國俄為山南西道節度使李訓鄭注始用事進襄武縣侯宣宗立貶郴州司馬卒韓愈作南山猛虎行以白之宗閔私黨益熾卒以此敗

李臯字子蘭曹王明之子也少補左司叅軍天寶十一載安祿山反遷左領軍將軍上書論治道詔授

衡州刺史為觀察使貶潮州會楊炎起道州為宰相如臯直復為衡州刺史建中元年進湖南觀察使前帥辛京果使部將王國良戍武岡貪其富即劾以死國良據縣反臯至遺書國良迎拜叩頭請罪臯執手納為昆弟盡焚攻守具散其兵有詔赦之賜名維新明年其母喪至江陵會梁崇義叛奪為左衛大將軍復觀察使湖南值李希烈叛臯設方畧乃取蘄州降其將李良平黃州兵益振舒王為元帥授臯前軍兵馬使德宗狩奉天包佶為陳少游所窘以運艚泝江次蘄口希烈使杜少誠絕

江道臯遣伊慎禦于永安走之以功進工部尚書  
 又遣伊慎王錡攻安州未下希烈遣劉戒援之臯  
 命李伯潛迎擊於應山俘之遂下安州斬偽刺史  
 王嘉祥希烈別遣兵援隋州臯破之屬鄉賊遂不  
 敢南略遷荆南節度使臯轉戰數千里餉路遂通  
 江漢倚臯為固初江陵東北傍漢有古鄆不治臯  
 修塞之得良田五千頃規江南廢洲為廬舍構二  
 橋跨江而流人自占者二千餘家餘荆抵樂鄉二  
 百里其間墟聚凡數十臯始鑿井以便人貞元初  
 徙鎮山南東道割隋汝以益軍練兵峙糧市回鶻

馬以益戰騎歲時大蒐以教士少誠畏之臯性勤

儉能知人張柬之有圃在襄陽臯嘗宴集將市取  
 之以人言而止其善補過類此卒年六十贈尚書  
 右僕射謚曰成韓愈撰碑其辭曰太玄十二曹於  
 弟李或亡或微曹始就事曹之祖王畏塞絕遷零  
 王黎公不聞僅存成王之作一自其躬文被明童  
 武鷹駿功蘓枯弱強齟其奸倡以報于宗以昭于  
 王

李回字昭度新興王德良六世孫長慶中進士策賢  
 良方正異等辟義成淮南幕府稍遷監察御史進

起居郎會昌中以刑部侍郎兼御史中丞俄拜同  
中書門下平章事以與德裕善坐貶湖南觀察使  
尋以太子賓客分司東都卒大中九年詔復湖南  
觀察使贈刑部尚書

李福字能之大和中第進士僖宗初以檢校尚書左  
僕射拜留守改山南東道節度使王仙芝寇山南  
福團鄉兵邀險偵之賊不敢入轉略岳鄂以逼江  
陵節度使楊知溫求援於福乃自將州兵率沙陀  
壯騎赴之賊已殘江陵鄂聞福至乃走還檢校司  
空同中書門下平章事旋為太子太傅卒

史南曰自漢而降為三國自晉而分為六朝其  
間服采于朝列職于郡者皆權謀以飾詐僥倖  
以圖存雖有魁梧軼宕之士朝剖符而莫屠戮  
者亦夥矣且統匪承乾治慚保泰故著之外紀  
而漢而唐而宋則內之焉爾贊曰有唐開國宗  
室登賢河間元功襄邑大編初陽元則固有可  
傳中王表臣厥德不愆岷監從誨夷簡惟詮昭  
度能之星聚虹連于以昭之山潢渺綿

李德裕

李珣

李承

李叔明

李德裕字文饒吉甫子也初書甫為郴州刺史能滅



公署物怪人咸稱之德裕以陰補校書郎河東張  
弘靖辟為掌書記召授監察御史穆宗即位擢翰  
林學士牛僧孺樹黨乃出德裕為浙江觀察使時  
帝荒游狎比群小德裕上冊宸六歲表太和三年  
召拜兵部侍郎裴度薦其才以兵部尚書拜中書  
門下平章事封贊皇伯俄而李宗閔罷德裕代為  
中書侍郎集賢殿大學士分司東都復貶袁州長  
史十年遷淮南節度使武宗立召拜門下侍郎同  
平章事入謝即進戒辦邪正專委任而後朝廷治  
近星家言熒惑犯上相又懇丐去位不允當國凡

六十年用兵籌邊決策制勝故威名獨重於時  
宗即位德裕奉冊太極殿帝退謂左右曰向行事  
近我者非太尉邪每顧我毛髮為森豎翌日罷為  
荆南節度使

李珣字侍價其先為趙郡人牛僧孺在武昌辟署掌  
書記還為殿中侍御史及李宗閔以罪去珣為申  
辨貶江州刺史徙河南尹復為戶部侍郎開成中  
楊嗣復得君引珣同中書門下平章事武宗即位  
再貶昭州刺史宣宗立內徙郴州刺史有李聽者  
自蔚州刺史徙安州觀察使柳公綽甚重之入為

羽林將軍又有李璉者朗州刺史修水利民賴之  
李承趙州人擢明經遷大理評事為河南採訪使未  
幾出補山南東道節度使時希烈猶據襄州承誓  
以死守希烈不能屈遂大掠去襄漢蕩然承撫安  
之居一年闔境完復尋檢校工部尚書湖廣節度  
使

李巽字令叔贊皇人以明經補華州參軍舉拔萃科  
授鄆尉進左司郎中常州刺史召授給事中出為  
湖南觀察使巽銳於為治持下以法察無遺私吏  
不敢少給順宗立轉兵部郎中長於吏事至松家

亦勾檢案牘簿書如公府會實參貶郴州巽時觀  
察湖南宣武節度使劉士寧致絹數千匹於參巽  
即劾參交通藩鎮以怒德宗遂殺參云又有李廩  
者為永州刺史元結撰記

李迴秀字茂之大亮之孫大亮安撫襄鄧遷安州刺  
史平王弘烈有功封武陽男迴秀及進士第轉考  
功員外郎改鳳閣舍人貶衡州長史

李叔明名晉閬州人乾元中除司勳員外郎建中初  
吐蕃襲火井掠龍州叔明分五將擊之以功加檢  
校戶部尚書梁崇義阻命詔引兵下峽戰荆門敗

其衆襄州平遷檢校尚書左僕射德宗幸薊元出家貲助軍悉衣幣獻宮掖加太子太傅封蘓國公時有李芄者亦仕湖南又有李仁鈞登貞元進士元和初自秘書省遷湖南觀察推官韓愈贈之文又有李兼者為鄂州刺史李希烈襲鄂兼大破之李翱字習之後魏尚書左僕射冲十世孫韓愈門人也中進士第始調校書郎元和初為國子博士史館修撰再遷考功員外郎貶朗州刺史久之召為禮部郎中翱峭鯁論議無所屈仕不得顯官改中書舍人遷桂管湖南觀察使唐末有李絢者為岳

州刺史死黃巢之難

史南曰唐宰相多自宗室諸賢仙李盤根而德裕秀挺丹宸之箴維州之議加人數等矣但其黨禍與唐終始可惜也哉自珏以下若承若巽若廻秀若叔明若翱有定論矣而翱又韓門佳弟子也贊曰德裕人豪克光先烈丹宸上箴雪山建勳珏承巽芄咸有可述李翱之賢昌黎龐益

楊元琰

楊於陵

楊嗣復

楊憑

楊漢公

楊元琰名温閬鄉人漢太尉震十八代孫也始除補

梓州參軍為平棘令再擢永安軍副使三徙為荆  
府長史轉刺史咸有風績初張柬之代為荊州共  
乘艦江中私語外家革命元琰悲涕慷慨志在王  
室東之執政故引為右羽林將軍謂曰江上之言  
君叵忘之今可以勉乃與李多祚等定計斬張昌  
宗張易之進雲麾將軍封弘農公

楊於陵字達夫元琰之族也擢進士為主簿入拜都  
部員外郎改吏部出補絳州刺史德宗雅聞其名  
擢中書舍人元和初貶郴州刺史徙原王傅復以  
戶部侍郎知吏部數上疏乞身不許授太子少傅

封弘農郡公俄以尚書左僕射致仕於陵器量方  
峻進止有常度節操堅明始終不失其正大和四  
年卒年七十八贈司空謚曰貞孝子嗣復

楊嗣復字繼之父於陵娶觀察使韓滉女生嗣復滉  
撫其頂曰名與位皆踰其父大和中宗閔罷嗣復  
出為劔南東川節度宗閔復相徙四川開成初以  
戶部侍郎出為嶺南轉運使俄與李珣並拜同中  
書門下平章事未幾中尉仇士良廢立用李德裕  
而罷嗣復為湖南觀察使會誅薛李稜劉弘逸中  
人多言嘗附嗣復珣不利帝剛卞即詔中使分道

卷之四十九

二十六

誅嗣復賴德裕與崔郾崔珙等救免宣宗立召為  
吏部尚書卒年六十六贈尚書左僕射謚曰孝穆  
子斐字公隱累擢左拾遺朱全忠叛師斐挈族奔  
湖南

楊憑字虛受弘農人大曆中進士授監察御史累遷  
太常少卿貞元十八年出為湖南觀察使性簡放  
接下脫略人多怨之在二鎮尤侈怏入拜京兆尹  
陟御史中丞禮部尚書卒柳宗元祭之文曰卿雲  
輪困天漢昭回自然物外寧間塵埃公稟間氣心  
靈洞開翱翔自得誰屑群猜御史之選朝之所汪

公勤于養接劾引去京兆之難下多怨惡公捍其  
強仁及童孺煩言既詆倚法斯繩南過九疑東逾  
秣陵顛沛三載天書乃徵入傳王國嘉聲聿興  
楊漢公字用又始辟李絳幕府累遷戶部郎中史館  
修撰轉司封郎中浙東觀察使繇戶部侍郎拜荆  
南節度使入為工部尚書

楊汝士字慕巢中進士第文擢宏辭牛李待之善為  
中書舍人開成初繇兵部侍郎出為荆南節度使  
楊儀之貞元十八年楊憑為湖南觀察使辟儀之為  
支使韓愈贈之文曰儀之智足以造謀才足以立

事忠足以勤上惠足以存下而又侈之以詩書六藝之學先聖賢之德音以威其文以輔其質宜乎從事于是府而聲實于天朝也

史南曰臣幼誦韓柳文稱楊氏者不一而足若元琰之風度於陵之節操嗣復之耿介虛受之抗直漢公之雅淳與夫汝士儀之端慤皆可書也贊曰諸楊秀茂鬱為國華元琰受知東之有加於陵自守嗣復靡他憑為觀察宗元通家漢公出鎮守已不誇汝士儀之昌黎興嗟

常倫

常思謙

常虛心

常銜

常倫京兆人始為監察御史貶衡州司理參軍度支使第五琦薦倫才擢荆襄道租庸使襄州裨將康楚元亂刺史王政棄城遁賊南襲江陵絕漢沔餉道倫調兵屯鄧州厚撫降賊寇益急乃擊禽楚元以獻收租庸二百萬緡召為廷尉卿俄兼寧隴二州刺史乾元中襄州亂詔倫為山南東道節度使盧杞惡之改太子少保後封郢國公有常慤者亦京兆人宣宗時為武昌節度使子保衡字蘊用咸通中尚同昌公主

常思謙名仁約以近武后父諱以字行其先出雍州

杜陵後客襄陽更徙為鄭州陽武人八歲喪母以  
孝聞及進士累調應城令高季輔曰子始得此夫  
豈以小疵棄大德耶擢監察御史思謙為御史自  
言不能動搖山岳震懼州縣為不任職復拜右肅  
政大夫封博昌縣男同鳳閣鸞臺三品

常虛字心無逸舉孝廉遷大理丞殿中侍御史神龍  
中歷荆潞揚大都督府長史荊州有鄉豪負勢干  
法虛心籍其貲入之官士人奉法盜賊為平入為  
工部尚書東京留守累封南皮子

常鐠字弱金中進士宏辭科辟河東府叅謀歷吏部

員外郎遷中書舍人開成元年權知貢舉繇吏部  
侍郎出為鄂岳觀察使卒贈禮部尚書

常宙京兆人觀察使丹之子也出為永州刺史州方  
災歎乃斥官中什用供刺史者得九十餘萬錢為  
市糧餉俗不知法多觸罪宙書制律并種植為生  
之宜戶給之州負嶺轉餉艱險每饑人輒斫死宙  
始築常平倉收穀羨餘以待乏罷冗役九百四十  
四員縣舊置吏督戰宙俾民自輪家十相保常先  
期豫備零陵產香歲貢上用之苦之宙為奏罷民  
貧無牛以力耕宙為置杜鬻牛以是為集父之牛

不乏立學官取仕家子弟十五克之舊民繙出財  
會賓無間晝夜多至數百入宙條約如禮邑中少  
年常以七月擊鼓群入民家喧呼疾鬪宙禁之還  
為大理少卿徙江西觀察使遷嶺南度節使旋加  
檢校尚書左僕射同中書門下平章事卒

史南曰臣致諸唐宰相世系常氏自平齊公而  
下知藝為襄州刺史懿為武昌節度使自高平  
男而下彤為澧州刺史延安為鄂州刺史之晉  
為湖南觀察使自彭城公而下仿為邵陽令懌  
然為鄂州別駕詵為荊州士曹絳為襄州司法

玄寶為安州司法元祉為襄陽令自逍遙公而  
下班為荊州刺史涵為邵州刺史擊為岳州刺  
史洸為襄陽總管自鄭公而下潛為澧州刺史  
勉為復州刺史凜為朗州刺史自南皮公而下  
詞為湖南觀察使乃若倫之有勞于襄而思謙  
之令應城也敷德政虚心之服采于荆而錯之  
鎮鄂岳也著威名至宙之綏民裕國則又越數  
子遠矣贊曰韋族華胄唐之台輔內弼皇謨立  
繩祖武倫暨思謙世篤其祐錯與虚心不渝厥  
度宙為循吏楚邦景慕



裴度

裴胃

裴休

裴均

裴冕

裴度字中立河東聞喜人貞元初擢進士第以宏辭  
補校書郎舉賢良方正異等調河陰尉遷監察御  
史論權嬖梗切補河南工曹參軍召為起居舍人  
元和六年以司封員外郎知制誥進御史中丞拜  
同中書門下平章事時諸道連兵內外大恐及度  
平蔡還朝內外治安進金紫光祿大夫弘文館學  
士上柱國晉國公是時牛僧孺李宗閔媚度勲業  
欲有所逞出度為山南東道節度使白罷元和所  
置臨漢蕪牧馬納之校以善曰四百頃還襄人從

東郡留守俄加中書令值閣豎擅威天子擁虛器  
縉紳道喪度乃治第集賢里沼石林叢岑繚幽勝  
午橋作別墅具燠館涼臺號綠野堂激波其下度  
野服蕭散與白居易劉禹錫為文章晝夜相歡不  
問人間事而帝知度年雖及神明不衰復以本官  
節度河東卒贈太傅謚文忠子識字通理補京兆  
參軍擢大理少卿進湖南觀察使入拜大理卿襲  
晉國公韓愈為撰淮西碑

裴胄字胤叔擢明經代宗時授殿中侍御史為元載  
所惡載誅始拜刑部員外郎遷宣州刺史楊炎當

國為載復讐貶汀洲司馬遷國子司業出為江南  
觀察使樊澤徙襄州宰相議所代德宗雅記胄才  
拜荆南節度使是時方鎮爭剝下希恩製重錦異  
綾名貢奉有中使者至即悉公帑市歡胄待之有  
節獻餉直不數金宴勞止三爵是時武臣多粗暴  
庸人待賓介不以禮胄亦劾斥之卒年七十五贈  
尚書右僕射謚曰成

裴潏晉公同邑人也元和初遷左補闕起居郎舍人  
帝起嚮方士而柳泌為治卅劑御之劑中躁渴潏  
諫曰夫除天下之害者受天下之利共天下之樂

者享天下之福故上自黃帝顓頊堯舜禹湯文武  
以功濟生人天皆報以壽考陛下以孝安宗廟以  
仁牧黎庶今乃信方士韋山甫柳泌等以丹術自  
神更相稱引詭為延年可乎夫味以行氣氣以實  
志水人鹽梅以烹魚肉宰夫和之齊之以味君子  
食之以平其心聖人節調以致康疆若乃藥劑所  
以禦疾豈常進之餌哉况金石酷烈包炎產毒未  
易可制秦漢之君亦信方士矣如盧生徐福藥大  
李少君後皆詐譎無成顛以所治劑俾其人服之  
以考真偽罔弗驗矣帝怒貶江陵令穆宗立召為

刑部郎中父之繇給事中為汝州刺史以大子左庶子分司東都遷左散騎常侍集賢殿學士改刑部侍郎卒贈戶部尚書謚曰敬侯

裴冕字童甫河東人蔭補渭南尉召為侍御史玄宗入蜀拜御史中丞肅宗立進中書侍郎同平章事坐薦舍人劉烜貶施州刺史徙澧州大曆中郭子儀白其誣復入為左僕射杜甫上詩曰廟廊之具裴施州宿昔一逢無此流金鐘大鏞在東序冰壺玉衡懸清秋自從相遇減多病三歲為客銷邊愁堯有四岳明至理漢二千石真分憂幾度寄書白

鹽北苦寒贈我青羔裘霜雪回光避錦軸龍蛇動篋蟠銀鈎紫衣使者辭復命再拜故人謝佳政將老已失子孫憂後來况接才華盛按甫集又送裴二端公赴道州有云上請減兵甲下請安井田其亦江湖而有廟廊之慮者耶

裴休字公美孟州濟源人擢進士第舉賢良方正異等歷諸府辟署入為監察御史拜門下平章事又之由太子少保分司東都復起為荆南節度使卒七十四贈太尉休不為讞察行所治畏信人不忍欺

裴均字君濟貞元十一年以吏部尚書為荆南節度使韓愈佐之為江陵法曹賦喜雪詩上之曰宿雲寒不卷春雪墮如筵聘巧先投隙潛光半入池喜深將策試驚密仰警窺自下何曾汗增高未覺危比心明可燭拂面愛還吹妬舞時飄袖欺梅併壓枝地空迷界限砌滿接高卑浩蕩乾坤合霏微物象移為祥矜大熟布澤荷平施已分年華晚猶憐曙色隨氣嚴當酒換灑急聽窓知照躍臨初日玲瓏滴晚漸聚庭看獄葺掃路見雲披陣勢魚巖遠書文鳥篆奇縱懽羅豔點列賀旌熊罴履散行偏冷門高卧更羸悲嘶聞病馬浪走快嬌兒竈靜愁煙絕絲繁念鬢衰擬盥吟舊句授簡慕前規捧贈同燕石多慙失所宜

史南曰裴氏為相者凡十有七人而有事於楚者則茂為襄陽節度使懷感為澧州刺史友悌為柳州刺史藏之及液為道州刺史而晉公之駿烈胤叔之勁節敬侯之直言君齊之美政與夫隣冕之貞操史炳如丹矣贊曰唐至中葉藩鎮崛強晉公平蔡建議朝堂淮西紀功昌黎大章胤叔持正力抗權璫敬侯讜議方士敗常章



崔日用滑州人擢進士第歷為成尉新豐令授監察御史出為荊州長史入奏計因上言太平公主逆節事後進吏部尚書卒謚曰昭贈荊州大都督子駿以明經進至兵部員外郎調荊州長史入為京兆尹封中山公

崔郾字廣略清河人中進士第補集賢校書郎歷吏部員外郎遷諫議大夫給事中敬宗嗣位拜翰林學士中書舍人出為鄂岳觀察使自蔡人叛鄂岳常苦兵江湖盜賊顯行郾修治鎧仗造蒙衝追擊之歲中悉捕平蒞鄂之日嚴法峻誅或問其故曰

鄂土沃民剽雜以夷俗非用威莫能治政所以貴知變者也聞者服之未幾召為檢校禮部尚書卒于官子璆任鄂岳觀察使瑾湖南觀察使

崔鉉字台碩擢進士第從李石鎮荆南為賓佐入為司勳員外郎翰林學士遷中書舍人學士承旨武宗會昌三年拜中書侍郎同中書門下平章事鉉入朝凡三歲至宰相而石猶在江陵澤潞平蕪戶部尚書與李德裕不協罷為陝虢觀察使咸通初徙山南東道荆南二鎮封魏國公龐勛叛所過剽略鉉聞大募兵屯江湖邀賊歸路賊懼更踰嶺朝

廷壯其忠卒於官子沆字內融累遷中書舍人貶  
循州司戶叅軍僖宗立召為永州刺史

崔慎由字敬止中進士第擢賢良方正異等為右拾  
遺進翰林學士授湖南觀察使

崔元略博州人中進士第更辟諸府累遷殿中侍御  
史以刑部侍郎知御史雜事拜中丞乃出為黔南  
觀察使徙鄂岳又乃拜大理卿

崔勉元和間為復州刺史時于頔節制襄陽政尚苛  
急勉之治所韓愈贈之文曰崔君為復州其連帥  
則于公崔君之仁足以蘓復人于公之賢足以庸

崔君有刺史之榮而無其難為者將在於此乎  
嘗辱于公之知而舊遊於崔君慶復人之將蒙其  
休澤也

崔陵字德長祐甫從子也性介絜喜矜已視賊負者  
若讐以蘇州刺史奏課第一遷湖南觀察使湖舊  
例雖豐年貿易不出境隣部災荒不恤也陵至謂  
屬吏曰此豈人情乎無閉糴以重困民削其禁自  
是商賈流通貨物益饒入為戶部侍郎判度支出  
為鳳翔節度使踰年徙河南尹以戶部尚書致仕  
卒贈太子少保謚曰肅又有崔簡字子敬柳宗元

姊丈也徙永州刺史卒

崔敏清河人尚書漪之子也初歷整屋三原藍田尉  
遷臨穎龍興令擢揚州錄事參軍入為太子司議  
出補歸州刺史州嚴險湍悍人多類鳥獸敏治多  
馴擾改永州刺史俗好尚鬼戶為胥徙家有襍裋  
悖於政經莫能禁禦敏約束部吏黜其侵牟毀其  
淫昏戮其奸帥征貢用集民狎於野嘗讌南池柳  
宗元撰文以為連山倒垂萬象在下浮空泛景蕩  
若無外羽觴飛翔匏竹激越熙然而歌婆然而舞  
不知日之將莫矣其卒也宗元銘其墓曰清河源  
源遠哉汙汙世有顯懿揚其清芬煥炳增華昭于  
後昆惟魴與鯉舊吏是尊尚書清風藹其有融勃  
然而興披草從龍布令諸夏敷和六戎赫矣太陽  
克昇於中公嗣餘慶刑於謠咏小成其功大遂其  
性黠吏是省妖風以正于邑于邦奉揚休命

史南曰臣按唐宰相世系自滎陽而下蔚為郢  
州刺史言道為岳州刺史知久為鄂州刺史自  
清河而下傳為鄂州刺史公復為復州刺史瑤  
為鄂岳觀察使自博陵而下曇為澧州刺史益  
為朗州刺史嚴為襄州觀察使士謙為江陵總



管若夫光遠而權而瑄日用而鄙而鉉慎由而  
元略而陵而敏均之政績可書者也贊曰崔氏  
著姓唐室宗臣公出司岳牧入典絲綸觀察節  
度歷播威名州牧長史累効勞勲九子之績陳

明用登

呂諲

呂元膺

呂溫

呂諲河東人開元末中進士第調寧陵尉授殿中侍  
御史肅宗才之拜御史中丞乾元二年九節度兵  
帝憂之擢諲同中書門下平章封瀕昌伯數月  
拜荊州長史澧朗峽忠等五州節度使諲始建請

荊州置南郡詔可於是更號江陵府以諲為尹置  
永平軍屯萬人遏吳蜀之衝以湖南之岳潭郴道  
邵連黔中之涪凡七州隸其道初荊州長史張惟  
一以衡州蠻首陳希昂為司馬督家兵自防親將  
牟遂金與相忤惟一懼斬遂金首以謝悉以兵屬  
之自是政一出希昂後遷常州刺史過江陵入謁  
諲伏甲擊殺之誅黨數十人積尸府門內外震服  
妖人申泰芝用左道事李輔國置軍邵道二州以  
泰芝總之納群蠻金寶群蠻林於賞而不足更為  
剽掠吏不敢制潭州刺史龐承鼎疾其姦縛泰芝

輔國矯追恭芝還京譖承鼎陷不辜詔譖按罪譖使判官嚴郢具獄暴恭芝之惡帝不省賜承鼎罪流郢建州後恭芝以賊敗承鼎得白其誣譖為治不怠細務決大事剛果不撓故威惠兩行譖與李揆不平既斥乃用善治聞揆恐帝復用即妄奏置軍湖南非便又陰遣人刺譖過譖上疏訟其事帝怒逐揆顯條其罪譖苦羸疾卒年五十一贈吏部尚書譖為荊州號令明賦歛均治尚威信軍士用命闔境無盜賊民歌詠之自至德以來處方面數十人譖最有名荆人生構祠及歿吏徙祠府西永泰中嚴郢以故吏請諡有司博士獨蘇及謚曰肅郢以故事宰相謚皆二名請謚曰忠肅

呂元膺字景夫東平人始游京師策賢良高第調安邑尉辟長春宮判官授殿中侍御史歷右司負外郎出為蘄州刺史嘗錄囚或白父母在明日歲旦不得省為恨因泣元膺惻然悉釋械縱歸而戒還期吏白不可荅曰吾以信待人人豈我違如期而至自是群盜感愧悉避境去元和中累擢給事中又出為同州刺史未幾兼皇太子侍讀進御史中丞遷鄂岳觀察使嘗夜登城守者不納左右曰中

丞至對曰夜不可辨乃還明日權守者為大將軍  
入拜尚書左丞吏部侍郎改太子賓客卒年七十  
二贈吏部尚書

呂溫字和叔河東人潭州刺史渭之子也貞元末舉  
進士補左拾遺元和元年進戶部員外郎為崔群  
所薦上許李吉甫陰事貶道州刺史徙衡州治有  
善狀卒於官柳宗元誄曰惟公舒文奮藻含章決  
科連中休問用張署讐百氏錯綜逾光超都諫列  
屢皂其囊帝殊爾能人服其智戎悔厥禍款邊求  
侍公登御史贊命承事風動海壖皇威以致來總

征賦甲茲郎吏制用經邦時推重器君自他曹載  
筆於技筆削自任群儒董議正郎司刑邦憲為貳  
糾逃伊肅民服休嘉恩踈若暱惕適如遐寔閑其  
問而撫其家載其愉樂申以舞歌賦無吏迫威不  
刑加浩然順風從今無譁絲蠶外邑我爾盈車雜  
耕鄰封我黍之華既字其畜亦藝其麻馨鼓斯屏  
人喜則多始富中教興良廢邾考績既成王用興  
嗟陟千嶽濱言進其律號呼南竭謳歌比溢欺吏  
悍民先聲如失逋租匿役歸誠自出兼并既悉罷  
羸乃逸惟昔舉善盜奔於憐今我興仁化為齊人

惟昔富氓或賑之粟今我厚生不竭而是邦思其  
鄉人戴惟父俾民伊而胡不壽

史南曰臣攷諸唐史乃見呂諲之誅希昂按秦  
芝呂元膺之感群盜擢守陴有足稱者及觀柳  
宗元之誄而呂溫之政又過人遠矣贊曰諸呂  
出牧咸在湖湘荊州沃壤蘄州名邦衡州上游  
祝融紫蒼三君善政民懷不忘

柳公綽

柳仲郢  
溫造

令狐楚  
溫廷筠

令狐峒

柳公綽字寬夫京兆人補校書郎授渭南尉召入為  
吏部郎諭月拜御史中丞公綽與裴均善李吉甫

富國拜翰林學士元和六年出為湖南觀察使後  
徙鄂岳時方討吳元濟詔發鄂岳卒五千隸安州  
刺史李聽公綽曰朝廷謂吾儒生不知兵耶即請  
自行許之引兵渡江抵安州聽以軍禮迎謁公綽  
謂曰公屬韃負弩豈非兵事邪若禡戎容則兩郡  
守耳以公世將曉兵吾豈且欲署職以兵法從事  
曰惟命即故鄂軍每戰輒克元和十一年還除給  
事中兼御史大夫長慶元年復為京兆尹改禮部  
尚書俄檢校戶部尚書山南東道節度使入為刑  
部尚書拜邠寧節度使贈太子太保謚曰元公初

縹在湖南值武岡苗叛公縹討之柳宗元撰武岡  
 銘曰黔山之瓚巫水之磻魚駭而離獸犯而殘戶  
 恐谷窳彼攘乃亂王師來誅期死以緩公明不疑  
 公信不期援師定命俾邦克正皇天仁施我反其  
 性我途既避公示之門我愚抵死公示之恩既骨  
 而完既亡而存奉公之訓貽我子孫我始螫賊由  
 公而仁我始冠酌由公而親山畋澤獻輸賦于都  
 陶穴刊木室我姻族烹牲是祀公受介福揲著以  
 占公宜百祿皇懋公功陟於大邦遠哉去我誰嗣  
 其良有穴之丹有犀之顛匪曰余故公不可賂祝  
 鄰之德恒依公則最余之世永謹來制南夷作詩  
 刻示來裔

柳仲郢字諭蒙母韓即臯女也元和末進士授校書  
 郎牛僧儒辟武昌幕府有父風召入為監察御史  
 遷左諫議大夫武宗延方士築望仙臺仲郢累諫  
 諄切帝遣中人諭之御史崔元藻以覆按吳相獄  
 得罪仲郢切諫宰相李德裕不為嫌奏拜京兆尹  
 以刑部尚書轉戶部封河東男出為山南西道節  
 度使

令狐楚子穀士德茶之齊也生五歲能為辭章逮冠

舉進士召授右拾遺憲宗時累擢職方員外郎知制誥為翰林學士進中書舍人方伐蔡父未下議者多欲罷兵帝獨與裴度斷然行之元和中出為宣歙觀察使俄貶衡州刺史徙太子賓客分司東都開成元年上巳賜群臣宴曲江楚以新誅大臣暴骸未收怨疹感結稱疾不出乃請給衣衾櫬槨以斂形骨是時政在宦豎數上疏辭位拜山南西道節度使卒年七十二贈司空謚曰文公子緒以蔭仕歷隋壽汝三州刺史絢門下同平章事

狐峘德蔡五世孫也天寶末進士遇祿山亂去終

南山豹林谷楊紉薦授華以別授右拾遺

遷起居舍人大曆中以刑部員外郎判南曹司郎中知制誥兼史館修撰建中初峘為禮部侍郎楊炎執政乃貶衡州別駕遷刺史李泌入相召拜太子右庶子復為修撰峘性耿介人人與為怨貞元五年坐守衡州冒前刺史戶口為已最實參素惡之復坐貶

溫造字簡輿姿表現傑性嗜書然盛氣少所降屈不善為吏隱王屋山號其居曰處士野後應辟累遷朗州刺史開後鄉渠百里溉田二千頃民獲其利

號右史渠召授侍御史值夏州節度使李祐拜大  
金吾違詔進馬造正衙抨劾祐曰吾夜入蔡州擒  
吳元濟未嘗心動今日膽落於温御史遷左司郎  
中進中丞文宗以為能乃授山南西道節度使許  
以便宜從事造至欲大宴視廳事曰此隘狹不足  
饗士更徙牙門坐定將卒羅拜徐曰吾欲聞新軍  
去住意可悉前舊軍無得進勞問畢就坐酒行從  
兵合卒有覺者欲引去造傳言叱之乃不敢動悉  
殺之斬首凡八百餘人祭死事宮王景延等餘悉  
投之漢江監軍楊叔元擁造靴祈哀造以兵衛之  
之詔流康州叔元始激兵亂者也以造不戮  
恨以功加檢校禮部尚書卒贈尚書右僕射

温廷筠字飛卿少敏悟徐商鎮襄陽辟為巡官又有

温遷約者知唐年累官司空卒于官

史南曰夫負奇氣者敷駿猷抱雋才者揚鴻烈  
乃若柳公綽守公權直耿之節而仲郢克遵成  
規令狐楚懷德蔡卓偉之才而緒岷咸踐顯位  
温造氣直臺端才華邦表而庭筠亦闡丕猷以  
承遠烈不亦允臧矣乎贊曰矯矯諸柳河東之  
英奕奕令狐有美德蔡温氏世濟丕赫其勳增

光石室如蘭斯馨

高復行

高重 杜悰

高元裕 杜景佺

杜正倫

高復行文獻公士廉之子也居母喪毀其太宗諭使

疆食尚東陽公主襲爵繇戶部尚書為益州大都

督府長史坐長孫元忌事遷洪州都督改永州刺

史為政有名

高重字文明以明經中第李巽表鹽鐵轉運巡官善

職凡十年進累同門下郎中敬宗慎置侍講學士

重以簡厚博雅與崔郾被選再擢國子祭酒文宗

好左氏春秋命重釋其義書成與鄭覃刊定九經

復出為鄂岳觀察使以美政被褒義之徵拜太子

賓客分司東都卒贈太子少保

高元裕字景圭其先渤海人第進士辟節度府以右

補闕累遷尚書左丞出鎮宣歙入陟吏部尚書拜

山南東道節度使封渤海郡公奏蠲逋賦甚衆在

鎮五年復召為吏部尚書元裕性勤約通經術敏

於為吏巖巖有風采推重于時卒贈尚書左僕射

杜正倫洹水人隋世舉秀才調武騎尉太宗素知名

表直秦王府文學館貞觀元年魏徵薦其才授兵

部員外郎進中書侍郎封南陽侯仍兼太子左庶



子出入兩宮典機密以辨治稱再貶交州都督太子廢坐流驩州久之徙郢州刺史顯慶元年召為黃門侍郎兼崇賢館學士拜同中書門下三品封襄陽縣公

杜棕字永裕以門蔭遷太子司議郎召見麟德殿授殿中少監駙馬都尉太和初由澧州刺史召為京兆尹出鎮鳳翔入為工部尚書判度支會公主薨棕久不謝文宗怪之李珣曰比駙馬都尉皆為公主服斬衰三年故棕不得謝帝矍然始詔杖而暮著于今會昌初節度淮南未幾用拜司空封邠國公以檢校司徒為荆南節度使加燕太傅適秦匡

謀討蠻兵敗奔於棕棕囚之劾不能伏節有詔斬之棕不意其死駭愕得疾卒年八十贈太師

杜景佺武邑人舉明經中第累遷殿中侍御史出為益州錄事參軍荊州司馬民歌之曰錄事意與天通州司馬折威風由是知名入為司刑丞檢校鳳閣侍郎同平章事

史南曰古之為名執政者必先為良守令以其澤及民化及士也化及士則君子有所恃而為善澤及民則小有所畏而不為惡若高氏三



君杜氏三子或自宰輔出牧郡邑或自守令入  
躋台斗可不謂賢乎贊曰士廉之後三君垂名  
履行元裕善寂彰聞正倫之族諸子能文綜暨  
景佺所在有聲備書于紀以詔後人

負半千

沈傳師 白敏中

蘇瓌 魯炅

蕭鄴 陸衰

牛僧儒 陸巖

負半千字榮期全節人擢高第歷華原武功尉遷水  
部郎中為弘文館學士武三思用事以賢見忌出  
為蘄州刺史半千不顯任吏常以文雅飾澤故所  
至禮化大行睿宗初召為太子右諭德仍學士職  
累封平原郡公表半千事五君有清白節年老樂  
山水自放開元九年遊堯山沮水間愛其地遂定  
居卒年九十四

沈傳師字子言少為杜佑所器貞元間舉進士復登  
制科授太子校書郎以鄴尉轉右拾遺左補闕史  
館修撰遷翰林學士休告帝遣中使敦召李德裕  
素與善開曉諄切終不出遂以本官兼史職出為  
湖南觀察使傳師與修憲宗實錄未成至是付傳  
師即官成之詔可寶曆三年入拜尚書右丞  
蘇環字昌容武功人隋尚書僕射威之曾孫擢進士  
第補恒州參軍歷朗州刺史入為尚書右丞同中

書門下三品封許國公睿宗即位進右僕射景雲  
元年罷為太子少傅卒年七十二贈司空荊州大  
都督謚曰文貞

蕭鄴字啓之梁長沙宣王懿九世孫及進士第授監  
察御史入翰林為學士出為衡州刺史召還為中  
書舍人以工部尚書同平章事懿宗初罷為荊南  
節度使仍平章事進檢校尚書左僕射徙劔南西  
川南詔內寇不能制下遷檢校右僕射山南西道  
節度使

白敏中字用晦太原人白居易為襄州別駕敏中承  
學長慶初中進士第遷右拾遺改殿中侍御史入  
翰林為學士承旨宣宗立以兵部侍郎同平章事  
刑部尚書檢校司徒加兼太子太師徙荆南懿宗  
立召拜司徒平章事咸通二年南蠻擾邊召敏中  
入議以太傅致仕卒贈太尉

魯吳幽州薊人以蔭補左羽林安祿山反拜上洛太  
守徙南陽封金鄉公尋為山南東道節度使時襄  
陽節度徐浩未至其子弟在軍挾金為資吳糾治  
之人心益固吳被祿山圍凡一年晝夜戰人至相  
食卒無救至德二載五月率衆突圍走襄陽吳殊

死戰斬獲甚重賊引去俄拜御史大夫襄鄧十州  
節度使兩京平賊走河北襄漢數百里鄉聚蕩然  
無樵煙賊欲剽亂江湖賴吳適扼其衝故南夏以  
完封峻國公

陸扆字祥文宰相贄族孫客於陝為陝人光啓二年  
擢進士第入翰林為學士陟尚書左丞封嘉興男  
徙戶部侍郎同平章事貶峽州刺史久之召拜工  
部尚書從天子自華州還以兵部尚書復當國封  
吳郡公

路巖字魯瞻魏州人及進士第懿宗咸通初歷屯田

員外郎入為翰林學士以兵部侍郎同平章事年  
三十六居位八歲至尚書左僕射徙荆南節度使  
貶新州刺史至江陵免官流澹州籍其家

牛僧孺字師黯隋僕射竒章公弘之裔元和初以賢  
良方正對策與李公閔皇甫湜俱第一調伊闕尉  
遷監察御史進考功員外郎集賢殿直學士穆宗  
初改御史中丞尋遷中書侍郎敬宗立進封竒章  
郡公出為武昌節度使鄂城土惡亟圮歲頻築賦  
養茅於民吏倚為擾僧孺陶甕以成五年舉鄂人  
無復歲費又廢沔州以省冗官文宗立李宗閔當

國屢薦僧孺復以兵部尚書同平章事宣宗立徙  
衡州還為太子少師卒贈太尉

史南曰唐制六典有節度有觀察有刺史有縣  
令有參軍長史書記之任以故士無遺逸官無  
曠鰥天寶以後彞法蕩然矣半千為斬刺史傳  
師為湖南觀察使瓌為荆都督鄴為荆南節度  
敏中為荆南檢校昺為襄陽節度宸為峽州刺  
史叡為荆南節度僧孺為武昌節度或以使相  
而下兼或以牧長而上陟或忤當途而左遷或  
扞強寇而右轉人品不同政績亦異馬爾贊曰  
貞沈之節用汲王明蘇蕭之政徵諸庶民白魯  
之勞蹇蹇王臣陸路之跡詵詵靡寧僧孺之績

武昌始城

鄭餘慶

鄭朗  
賈參

鄭審  
賈常

賈群  
盧簡辭

盧景亮

鄭餘慶字居業鄭州人少善屬文擢進士第貞元初  
遷庫部郎中入翰林為學士十四年拜中書侍郎  
同平章事每奏對多傳經義素善度支使於頌凡  
所陳必左右之知坐事貶餘慶為郴州司馬順宗  
時召為尚書左丞憲宗立復拜同平章事加太子  
少師封鄖陽公贈太保謚曰貞

鄭朗字有融始辟柳公綽山南幕府入補右拾遺開  
成中擢起居郎累遷諫議大夫為侍講學士出守  
華州入拜御史中丞復出為鄂岳觀察使進義武  
宣武二節度歷工部尚書同平章事

鄭審大曆初為秘書監三年出補江陵少尹杜甫秋  
日寄鄭監詩百韻有曰鄭李光時論文章並我先  
陰何尚清省沈宋剡聯翩律比崑崙行音知燥濕  
絃風流俱善價愜當久忘筌置驛常如此登龍蓋  
有焉

竇參字時中刑部尚書誕四世孫及江反討召為監

察御史先是湖南判官馬燧發部令賊千萬因  
往按直其侵蟻燧後佐曹王臯以幹直聞參復坐  
貶郴州別駕宣武劉士寧餉參絹五千疋湖南觀  
察使李巽以狀聞帝大怒欲殺參陸贄雖舊有怨  
力救之乃免貶驩州司馬今蒲圻有竇丞相祠豈  
其謫居流寓耶

竇群玉字丹列京兆人德宗擢為右拾遺憲宗立轉  
膳部員外郎兼侍御史出鎮唐州于頓聞其名與  
語奇之表以自副出為湖南觀察使改黔中會水  
壞城郭群蠻亂貶開州刺史稍遷容管經畧使召

還卒于行

竇常字中行大曆中進士客廣陵多所論著隱居三十年鎮州王武俊聞其才奏辟不應杜佑鎮淮西署為將軍參謀歷朗州刺史國子祭酒致仕卒贈越州都督

盧簡字子策累擢湖南觀察使以檢校工部尚書為忠武節度使

盧景亮字長晦范陽人中進士第授秘書郎張廷賞節度荆南表為枝江尉掌書記入遷右補闕宰相司馬又盧行簡父為襄陽太守

愈誌其墓

史南曰臣攷諸唐宰相世系鄭氏自胤伯而下玄瑾為蒲圻令光系為蒲圻尉怱為湘潭令季良為澧陽尉依義為湘鄉令德秀為江陵令遐為衡山令武為竟陵令正則為復州刺史仲為鄂岳觀察使延休為山南東道節度使詔業為荆南節度使自靈虬而下常侑為鄂州刺史孝寬為黃州刺史道德為安州刺史崇業為永州司馬表微為江陵少尹竇氏自義安而下宣孟為長沙令承孝為夷陵太守自西河而下弘餘

唐書

卷四十九

五十二

為黃州刺史鞏為鄂岳觀察使盧氏自陽烏而  
下大道為荊州刺史正道為鄂州刺史士英為  
岳州刺史全操為房州刺史當為邵州刺史疑  
為郢州刺史自孝簡而下翊為鄂州刺史昂為  
澧州刺史而其有名于時若餘慶若朗若審若  
參若群玉若常若簡辭若景亮皆有聞于楚者  
也贊曰鄭伯之後世為閎閎實武之後代表烈  
烈盧氏多賢惟勤廣業爰發蘭臺以章史策玄  
瑾光系吾補流澤

于頔 齊映 關樞 袁滋

于頔字允元後周太師謹七世孫蔭補華陰尉歷長  
安令為駕部郎中貞元十四年拜山南東道節度  
使時吳少誠叛頔率兵自唐州戰吳房朗山取之  
禽其將李燦於是升襄州為大都督府以頔總之  
廣募戰士儲良械擱然有專漢南意帝晚務姑息  
頔所奏建無不開納累遷檢校尚書左僕射同中  
書門下平章事封燕國公初襄髹器甚工頔驕蹇  
故方帥不法者多劾充憲宗立權綱自出頔稍懼  
頔以子尚主帝許之遂入朝拜司空同中書門下  
平章事



齊映高陽人中進士第補河南府參軍貞元二年以  
舍人同中書門下平章事封河間男與崔造劉滋  
輔政始映徵時張延賞遇之善及映相而延賞左  
僕射數為映畫事坐貶夔州刺史徙衡州久之為  
桂管江西兩觀察使映罷乃掎歛獻貢以中帝欲  
初諸潘銀瓶止五尺李兼為江西始獻六尺瓶至  
映乃加八尺云年四十八卒贈禮部尚書

關播字務元汲人及進士第德宗初湖南尚賊王國  
良叛詔播宣輯因得請事對殿中帝問政治之要  
播曰為政之本要得有道賢人乃治且言奉詔平

賊有知不受命臣請發州兵翦定之帝納之貞元  
初檢校尚書左僕射

袁滋字德深蔡州人陳侍中憲之後少依道州刺史  
元結讀書自解其義結重之後客荆郢間起學廬  
講授建中初趙贊薦于朝授校書郎德宗選郎吏  
可撫循者皆憚行滋不辭帝嘉之擢祠部郎中兼  
御史中丞憲宗監國進拜中書侍郎同中書門下  
平章事復出檢校兵部尚書山南東道節度使徙  
荆南吳元濟反遷湖南觀察使累封淮陽郡公卒  
年七十贈太子少保

史南曰詩有之維此聖人瞻言百里秉心宣猶  
考慎其相夫人君以論相為務宰相以正君為  
急太宗相房杜而貞觀之治成玄宗相姚宋而  
開元之業興天寶以後內盡于楊貴妃外惑于  
李林甫是故安史亂而藩鎮強唐之元氣索然  
矣于頔之製髹器齊映之飾銀瓶開播之擅誅  
勅袁滋之專寵貶臣而有作福作威王食尚為  
僭分而况四子出為岳牧入踐台衡可不加慎  
乎贊曰宰相之職上干中台內居綸閣外總制  
臺協恭和衷調元化裁于齊關表亦已焉哉

顏真卿

劉知幾

吳兢

顏真卿字清臣祕書監師古五世從孫也少孤母殷  
躬加訓導既長博學工辭章開元中舉進士擢制  
科調醴泉尉授監察御史出為平原太守安祿山  
逆狀芽蘖真卿增俾濟隍料才壯儲廩祿山以  
為書生不校也祿山及河朔盡陷獨平原城守完  
使司兵參軍李平馳奏玄宗歎曰河北二十四郡  
無一忠臣邪朕不識真卿何如人所為乃若此是  
時從父兄杲卿為常山太守斬賊將李欽奏等情  
土門十七郡同日自歸推真卿為盟主詔郎拜戶

登續山經前 卷四十九  
部侍郎佐李光弼討賊肅宗即位靈武真卿數遣  
使以蠟丸裹書陳事拜工部尚書兼御史大夫復  
為河北招討使遷御史大夫李輔國遷上皇于西  
宮真卿率百官問起居輔國惡之貶蓬州長史代  
宗立起為利州刺史不拜再遷吏部侍郎除荆南  
節度表云荆南巨鎮江漢上游右控巴蜀左聯吳  
越南通五嶺北走上都寇賊雖平襟帶尤切雖叔  
子仁德元凱智囊居之猶或病諸過此豈宜濫據  
祇承睿顧伏深慙惕先是春卿為荆南司馬杲卿  
為湖南判官故今蒲圻有白石忠節祠又南承嗣  
者霽雲子也自治州徙澧州柳宗元贈之文又有  
南卓者為松滋令以政績聞

劉知幾字子玄擢進士第調獲嘉主簿中宗時擢太  
子率更令介直自守遷太子左庶子兼崇文館學  
士開元初兼左散騎常侍會子貺有罪子玄請于  
執政玄宗怒貶安州別駕子玄領國史且三十年  
官雖徙職常如舊禮部尚書鄭惟忠嘗問自古文  
士多史才何耶對曰史有三長才學識世罕兼之  
夫有學無才猶愚費操金不能殖貨有才無學猶  
巧匠無榘枘斧斤弗能成室為史者善惡必書使

驕君賊臣知懼此為無可加矣時以為篤論

吳兢浚儀人神龍中改右補闕始競在長安景龍間  
任史事時武三思張易之等監領事多不實競不  
得志私撰唐書春秋未就至是西官筆札冀得成  
書詔競就集賢院論次時張說罷相在家修史大  
臣奏國史不容在外詔競等赴館撰錄進封長垣  
男久之坐書事不當貶荊州司馬以史草進隨蕭  
嵩校史奏遣使者就競取書得六十餘篇累遷洪  
州刺史天寶初入為恒王傳

史南曰諫官者一時之耳目史官者萬世之龜

精定在華表而知其心之史競之攻要與頌爭

光矣昔嘗弭節安州訪其遺蹟乃見之春樹歲  
黜林蘭芬烈既而息轅蒲谷謁其廟貌了見大  
白石嵯峨清泉屬 又其既也開軒展卷則又  
見夫所編貞觀政要萬代帝王所當法也以  
三顏朝祀二兄盡忠一弟盡孝攷之顏氏陋巷  
譜春卿為荆南司馬杲卿為湖南判官而真卿  
為節度可謂以勞定國以死勤事者矣贊曰子  
玄古史唐宗匠吳兢秉筆政要審尚董狐並

南史敬讓顏氏忠節光昭穹壤廟祀白石

心嚮往

王翊 王起 韓思復 韓朝宗

王翊字完肱晉陽人天寶中授翊衛尉出為辰州刺史預討襄州康楚元有功加兼秘書少監選朗州刺史大曆中擢容管經畧使初安祿山亂詔領南兵隸南陽魯炆敗績衆奔潰谿洞夷獠相挺為亂翊討平之號平南郡代宗知其名目為純臣卒贈戶部尚書謚曰忠惠

王起字舉之始為後書郎補監田尉召為殿中侍御

史兼集賢殿學士元和末累遷中書舍人授兵部尚書山南東道節度使地濱漢江塘堰聯屬吏弗完治起至部修復與民著為水令凶年有賴李訓為相引與共政加銀青光祿大夫復以兵部尚書召判戶部開元三年入翰林為學士陟太子少師卒贈太尉曰文懿

韓思復字紹之長安人初為梁府參軍擢司禮博士轉禮部郎中出為襄州刺史入拜給事中開元中為諫議大夫黃門侍郎復為襄州刺史治郡有聲故吏廬僊邑人孟浩然勤石峴山以紀其績召為

太子賓客卒謚曰文子朝宗

韓朝宗初歷左拾遺出為荊州長史開元二十二年

初置十道採訪使朝宗以襄州刺史兼山南東道

襄楚故城有昭玉井傳言汲者死行人雖渴困不

敢視朝宗移書諭神自是飲者亡恙人更號韓公

井坐所任吏擅賦役貶洪州刺史天寶初召為京

兆尹

史南曰朗州近谿洞諸夷荆江雅雲夢諸藪而

襄陽峴山為鎮漢水為池皆形勝他也二王二

韓咸有遺績亦可擬跡伏波魏勳元凱爾矣贊

曰伏波壺頭尚滯干羽王輝平之厥功可紀召

父石渠猶鮮疏治王起達之厥利水裕襄陽雄

鎮誰紹杜羊韓氏父子于前有光

薛季昶

薛存義薛景晦

薛伯高第五琦

薛莘

薛季昶者龍門人武后時上書自布衣擢監察御史

坐累左遷平遙尉復拜御史進戶部侍郎五王失

柄出為荊州長史

薛莘寶鼎人初為長安令歷虢州刺史憲宗時奏最

擢湖南觀察使徙浙東以治行加御史大夫累封

河東郡公所居守法度務在安民治身儉薄所衣

綠袍更十年至緋衣乃易居三鎮聲樂不聞于家  
所得祿即散親故無餘藏除左散騎常侍年七十  
致仕

薛存義河東人唐元和間為湘源令會永郡政厯賦  
擾改零陵令蒞邑遁逃復還蠹奸披露逋租匿後  
暮月而理門不施胥吏之席耳不聞鞀鼓之聲乃  
積坳為池礮石為亭高者冠山巔下者俯清池山  
水魚鳥之樂澹如也柳宗元為記

薛伯高河東人元和七年自刑部郎中出為永州刺史  
除穢革邪斥象祠新學校州民歌曰我有耆老

公煥其饒我有疲瘵公起其之醫醫吾里之醫公實之  
之鰥寡孔艱公實遂之柳宗元為毀鼻亭記時有  
薛異者貶朗州

薛景晦長慶間為道州刺史居郡事理無所事事劉  
禹錫云兄出中臺守江華人咸以為牛鼎烹鮮是  
亦孔子牛刀割鷄之况也

第五琦字禹圭長安人少以吏幹進頗能言疆國富  
民術天寶中事帝堅敗不得調父之為湏江丞乾  
元二年進同中書門下平章事實應初起為朗州  
刺史有異政拜太子賓客

狄兼謨字汝諧梁公之後也及進士第辟襄陽府使  
剛正有祖風令狐楚執政薦授左拾遺上書言事  
歷刑部郎中出為蘄州刺史

史南曰臣攷諸唐宰相世系薛氏自馥為荊州  
刺史長為江陵少尹第五氏自倫有聲于漢狄  
氏自仁傑有功于唐若季昶若革若存義若伯  
高若景晦皆見于韓柳文集而琦之治胡兼謨  
之智蘄胥有足徵矣贊曰河東三鳳薛氏著名  
季昶存義錯節盤根伯高景晦排難解紛革守  
儉素琦懋才能兼謨繩武狄梁昭勳

左振

孟簡

趙宗儒

孫簡

周崇

許志

左振唐元和己亥為黃州刺史元結表云振初下車  
黃人歌曰我欲逃鄉里欲逃墳墓左公今既來誰  
忍棄之去天下共興今七年矣河淮之比千里荒  
草自關已東海濱之南屯兵百萬不勝征税豈獨  
黃人能使其人忍不去者誰曰不可頌乎近年以  
來以陰陽變恠鬼神之道罔上惑下尊重於當時  
者日見欺人黃之巫女亦以妖妄得蒙恩澤朝廷  
不敢詰州縣惟其意振忿殺之居三年遷侍御史  
判金州刺史將去黃黃人多去思



孟簡字幾道德州人舉進士宏辭擢倉部員外郎元和中拜諫議大夫出為山南東道節度使時中使華重宰相多由此進崔群既相而簡代之故簡意且柄任及出鎮不樂政頗嚴峭

郝士美字和夫兗州金鄉人德宗即位召為太子左庶子集賢殿學士出為黔中守累觀察使溪州賊向子琪以衆八千峙山剽劫士美討平之加檢校右散騎常侍封高平公遷京兆尹天子多所咨建復出為鄂岳觀察使贈尚書左僕射謚曰景

庾準者常州人初為汝州刺史復入為司農卿善楊

炎出為荆南節度尚書左丞建中三年卒贈工部

### 尚書

嚴郢字叔敖華陰人及進士第補太常協律郎呂諲鎮江陵表為判官方工申泰芝以術得幸肅宗邀遊湖衡間以妖幻詭衆姦賊鉅萬潭州刺史龐承鼎按治帝不信召還泰芝不承鼎于江陵獄御史中丞敬羽白貸芝郢方入朝亟辨之帝怒叱郢去郢復曰承鼎劾泰芝詭沓有實泰之言承鼎驗不存今緩有罪急無罪臣死不敢如詔帝卒殺承鼎流郢遠州泰芝後坐妖妄不道誅代宗初追還承

有系以系前、  
鼎官召郢為監察御史

孫簡字樞中元和初登進士辟荆南募府累遷吏部郎中繇諫議大夫知制誥進中書舍人初孫逖掌誥至代宗時孫宿又居職建簡凡三世會昌初遷尚書左丞

樊澤字安時河中人始為堯山令舉賢良方正遷山南東道司馬就拜節度使諸將憚其才武貞元三年為荆南節度使會曹王臯卒軍亂剽居人以澤威惠著襄漢間復徙山南東道加檢校尚書左僕射卒年五十七贈司空謚曰成計至帝為撤宴廢

朝韓愈與其子宗師游為撰墓誌

趙宗儒字秉文鄧州人能文章開元中進士初為御史擢翰林學士轉司勳貞元十二年同平章事累遷禮部尚書出為荆南節度使柳宗元上啓曰今之為文莫有居趙司勳右者恒欲飾論薦之閣下嘗見稱于崔鵬又辟符載為江陵士曹散冗食戍二千人歷山南西道召入為吏部尚書卒謚曰昭

許志雍或曰名仲輿貞元九年進士于頔節制山南時志雍為郢州刺史韓愈贈之文曰先達之士得

人而託之則道德彰而名譽流後進之士得人而託之則事業顯而爵位通誠使刺史不忘其民觀察使不急其賦如是而政不均令不行者未之有也時于頔政大急故愈言及之

周巢唐元和間為負外郎出補隨州刺史韓愈贈之詩曰行行指漢東暫喜笑言同雨雪離江上蒹葭出夢中面猶含瘴色眼已見華風歲暮難相值酣歌未可終先是陸長源孟叔度丘穎楊凝暨巢同為董晉幕府故愈詩又云陸孟丘楊又作塵同時存者更何人金丹別後知傳得乞取刀圭救病身

柳宗元亦有答巢論餌藥延壽書

史南曰不惟其官惟其人不惟其人惟其德元結知左振之賢也而表之韓愈知樊澤之賢也而志之柳宗元知趙宗儒之賢也而贈之乃若孟簡之為節度邾士美之為觀察庾準之鎮荆南嚴郢之効方士孫簡之贊幕府許志雍周巢之司攝牧尉非無一善可稱其寸朽不足損連抱也贊白荆楚之分上昭軫翼岳牧之職內衛京邑群賢出鎮各有其秩左孟邾庾克熙厥績嚴孫趙許允協于極樊周贈章詩詞有奕

趙善俊

趙善俊

趙彦櫛

趙汝愚

趙善俊字俊臣宋太宗七世孫紹興二十七年進士

補承務郎調南城丞虞允文薦知郴州敷奏稱旨

遷龍圖閣學士復出知鄂州適南市火善俊亟往

視事弛竹木稅發粟賑民開古溝創火巷以絕後

患僚家欲漕俸善俊曰將濟已肥民乃省宴游車

騎鼓吹諸費代輪役錢郡計用裕轉湖南帥郴桂

地遠守多非才善俊疏宜精其選於是輸潭州經

總制錢停醴陵潑水渡稅民被其澤加秘閣修撰

孝宗時日有黑子善俊極論相位不可無人以此

觸許權臣卒年六十四

趙彥俊字安卿彭城使叔襲曾孫初調溧陽尉徙於

潛令更遠湖南運判僑人羅孟傳叛彥俊謂帥臣

離其黨與俾自相攻遂降之徙知紹興召入直寶

謨閣為大府少卿

趙彥櫛字文長悼王七世孫乾道二年進士初調樂

清尉徙晉陵令累遷湖廣總領官舊士卒物故大

將多私其月餉彥櫛置別籍核之持行三年贏積

益饒遷寶謨閣侍制

趙汝愚字子直漢恭憲王元佐七世孫居饒之餘干

縣擢進士第一簽書寧國軍判官召試秘書省正  
字孝宗銳意恢復始見即陳自治之策遷校書郎  
兼太子侍講光宗受揮趣召未至殿中侍御史范  
處義論其稽命除知潭州紹熙二年召為吏部尚  
書坐累水州安置韓侂胄忌之至衡州病作為守  
臣錢鏐所窘暴薨天下聞而寃之時慶元二年正  
月壬午也卒謚忠定弟汝讜孫必愿

趙汝讜字蹈中汝愚之弟也胡統攻汝愚而汝讜亦  
坐廢十年後辟浙東幕官改湖南提舉既至表直  
臣龔夬之墓瀏陽有豪宗羅氏侵民產汝讜懲以

法嘗言宗子不忘君孝子不忘親立身當如子正  
臨難當如朱虛其素志如此

趙必愿字立夫汝愚之孫也授湖廣總所幹辦公事  
上言請訪周敦頤之後士民稱服

趙聿之安定郡王叔東子也建炎中授成忠郎金人  
圍潭州帥臣向子諲率衆守城隸東壁金兵登城  
縱火車之巷戰被執大罵而死武經郎劉玠亦死  
之事聞贈左監門衛大將軍

史南曰趙宋自東宮而下列侯樹屏有親親之  
道焉拔雋夾輔有賢賢之道焉是故聯親親以

叙王牒無唐家推刃之嫌錄賢賢以鞏金城有  
周室維藩之義乃若善俊之瘠已肥民而彥倓  
彥櫛各奏爾能汝愚之薦賢為國而汝謹必愿  
繩其祖武至聿之之死難又宗室尤難也贊曰  
宗子維城周詩所紀宗室夾輔漢史多歸宋氏  
本支或源或委尊尊親親守法無訾善俊倓櫛  
仙潢並美汝愚謹愿王勲有煇聿之死難名垂  
不死

趙普

趙抃

趙野

趙蕃

趙逢龍附

趙普字則平幽州蓟人建隆三年拜樞密使檢校大

保乾德二年范質等三相同日罷以普為門下侍  
郎平章事五年春加右僕射昭文館大學士未幾  
出鎮河陽太宗太平興國元年召入為太子太保  
四年復出為山南東道節度使先是有趙延進者  
為襄州總管築堤扞水易斃以石民多賴之召入  
為武衛將軍

趙抃字閱道衢州西安人及進士第歷遷殿中侍御  
史神宗立召知諫院尋為江南提刑時周敦頤為  
邵州別駕始臨之甚威既而熟視立執其手曰幾  
失老友又有趙誠者皇祐間知歸州先是山頽江

石斲流誠附新縱火烈石功名曰趙江

趙野開封人政和二年進士歷殿中侍御史中書舍

人歷陟刑部尚書兼翰林學士徽宗蒙塵坐事安

置邵州建炎中盜賊充斥杜彥作亂被害

趙蕃字昌父其先鄭州人建炎初祖暘以秘書少監

調辰州司理叅軍蕃少受學於劉清之後清之守

衡州蕃求監安仁酒庫以卒業焉真德秀書于國

史曰蕃於師友如此肯負國乎

趙湘字巨源華州人舉進士遷秘書著作佐郎累歷

太常少卿知襄州有善政負為集賢院學士其秋

日詩云天遠草離離秋霖寄信逢相思逢葉盡

坐聽蟬悲岳色寒前見松心雪後知頻招猶未至

時復檢清辭

趙逢龍字應甫鄞人嘉定十六年進士歷知興國及

衡州提舉湖南常平有司例設供帳悉令撤去日

惟蔬食坐公署事至即決務存寬恕撫諭惻怛一

以天理民彛為言究心荒政以羨餘為平糴後召

為宗正少卿兼侍講

趙雄字溫叔資州人隆興元年省試第一淳熙中知

江陵府始築城固守民不告擾又有趙汝瞻紹定

登續內紀前  
卷四十九  
六十九  
聞知臨武秩滿民祠有德政碑

史南曰宋有韓王開國以半部論語佐太平論者多譏之以其托孤寄命臨節不奪有愧焉爾然而清獻琴鶴自隨能識濂溪子屬曹是盖有過人者至若野之去國蕃之講學湘之詠歌逢龍與雄之出牧咸可書也贊曰韓國元勳宋朝碩輔金匱渝盟豈容再誤野蕃暨湘逢龍篤祐温叔築城汝瞻懷慕

張齊賢

張詠 張商英

張齊賢字師亮曹州人太祖幸西都齊賢獻策十事

歸語太宗曰他時可使為相太宗擢進士欲置齊賢高第有司失選上不悅特賜齊賢為大理評事通判衡州時州鞠劫盜論皆死齊賢至活其失入者五人自荆渚至桂州水邊舖夫數千戶困于郵役衣食多不給論奏減其半四年代還六年為江南西路轉運副使改右補闕加正使初李氏據有江南民戶稅錢三千已上者戶出丁一人黥面自備器甲輸官庫出即給之各為義軍至是言者以為此輩不樂耕農宜選充軍伍齊賢上言江南義軍例皆良民橫遭黥配無所逃避克復之後便放



歸農久被皇風並皆樂業若逐戶搜索不無驚擾  
法貴有常政尚清淨人皆賴之齊賢居職勤究民  
弊務行寬大召還拜樞密直學士擢右諫議大夫  
簽書樞密院事淳化二年叅知政事數月拜吏部  
侍郎同中書門下平章事真宗即位拜兵部尚書  
卒贈司徒謚曰文定

張詠字復之鄆城人少任氣不拘小節太平興國五  
年進士乙科授大理評事知鄂州崇陽縣拔茶植  
桑民庇其利遷著作佐郎以蘇易簡薦入為太子  
中允祕書丞通判麟相二州俄召還賜緋魚拜謝

湖北路轉運使奏罷歸峽二州水滸失就轉太常

博士太宗聞其強幹召還超擢虞部郎中賜金紫  
旬日與向敏中並擢為樞密直學士同知銀臺司  
兼掌三班院復出知益州真宗即位遷諫議大夫  
咸平初甫拜給事中改御史中丞二年同知貢舉  
故其言曰事君者廉不言已苦忠不言已效公不  
言已能斯可以事君矣性躁果卞急以為乖則違  
衆崖不利物有乖崖集十卷卒謚曰忠定韓魏公  
琦銘曰大行峙朔洪河瀉天河山之間實生大賢  
賢不徒出惟聖偶焉發為事業文武之全兩治西

蜀荐綏南夏易亂以寧即荒而化夫惟管蕭尚足  
王霸如公之才不宰天下而俾惠澤止濡一方錫  
民父母遺國棟梁有煇公蹟日星之光何假斯文  
始傳其芳

張商英字天覺新津人長身偉然姿采如恃玉負氣  
淑黨豪視一世調通州主簿擢監察御史臺獄偶  
逸盜劉奉世駁之詔責商英監荆南稅更十年乃  
得館閣校勘出為河北都轉運使降知隨州崇寧  
初為翰林學士蔡京拜相商英與之善拜尚書左  
丞京罷相削籍知鄂州京復相以散官安置歸陝

兩州後以觀文殿大學士知湖南府旋貶崇信軍  
節度副使衡州安置宣和三年卒贈少保謚曰文  
忠

史南曰臣聞諸葛孔明開誠心布公道集衆思  
廣忠益萬世相天下者之龜鑑也蓋必君臣相  
知之深而後能相濟其不足乃若宋藝祖知齊  
賢有謀國之畧詠有靖變之才商英乃獨不然  
者存乎其宅心之弗宏耳是故開誠布公集思  
廣益又相度不可少也贊曰大都君相登崇俊  
良地天交泰風雷感祥文定獻策卒奠疆場忠

定宣猷殄滅暴強文忠比朋罔可頡頏

寇準

寇瑗 薛居正 薛徽言 夏竦 薛弼 史嵩之 虞允文 辛次膺 辛棄疾 洪适 疾 洪彥昇

寇準字平仲華州下邳人少英邁通春秋三傳年十

九舉進士授大理評事知歸州巴東召試學士院

授右正言直史館會詔百官言事進陳利害帝器

重之擢尚書虞部郎中真宗即位遷尚書工部侍

郎咸平初陟兵部尚書為樞密院使同中書平章

事三年集賢殿大學士坐累為太常卿知湘州徙

安州貶道州司馬帝初不知也他日問左右曰吾

目中久不見寇準左右莫敢對乾興元年再與雷

州司戶叅軍天聖元年徙衡州司馬卒歸葬西京

道出公安人皆設祭哭於路折竹植掛紙錢逾月

視之枯竹盡生筍衆因為立廟後復太子太傅贈

中書令萊國公謚曰忠愍皇祐四年詔翰林學士

孫朴撰神道碑帝為篆其首曰旌忠

寇瑊字次公臨汝人擢進士授蓬州推官開封推官

會施州蠻叛命瑊討之瑊至請募人入來償以鹽

軍食遂足而民力紓復招諭田彥伊子承寶入朝

得給印紙未幾溪南蠻復內寇瑊率衆擒其酋領

戮之以向芳子弟數百人築柵守其險要就除大理寺丞

薛居正字子平浚儀人宋初遷戶部侍郎為樞密直學士知貢舉初平湖湘以居正知朗州會亡卒數千人聚山澤為盜監軍使疑城中僧千餘人皆其黨欲盡誅之居正緩其事擒賊帥汪端詰之僧皆不預賴以全活乾德初加吏部侍郎開寶五年兼湖南都提舉召入為門下侍郎監修國史六年拜侍郎同平章事

薛弼字直老永嘉人政和二年進士調懷州刑曹抗州教授改湖南運判楊公據洞庭寇鼎州王燮久不能平更命岳飛討之飛謀造大舟弼曰若是則未可歲月勝矣且彼之所長可避不可闢也今大旱湖水落作筏斷江路藁其上流使彼之長坐廢而精騎直擣其壘則破在目前矣果如其策破之歲荒道殣相望弼以聞帝惻然命給錢陸萬緡賑之未幾除戶部郎官再知荆南桃源劇盜白俊招安復叛提點万俟卨不能制乃以委弼處之咸宜遷秘閣修撰陝西轉運使以左司郎官移黃州薛徽言字德文温州人舉進士第為樞密院計議官

紹興二年奉命拜監察御史宣諭湖南時柳道桂  
陽旱飢徽言諭漕臣發衡永米以賑而以經制銀  
市米償之所刺舉二十人使還他使皆進擢宰相  
呂頤浩以徽言擅易守臣移用經制銀出知興國  
軍久之遷起居舍人子季宣字士龍年十七辟荆  
南帥袁溉府幕中武昌令劉琦諮討居多汪澈宣  
諭荆襄金兵適至季宣贊其謀

夏竦字子喬江州人舉賢良方正擢光祿寺丞直集  
賢院為國史編修官仁宗初王旦數言竦才擢尚  
書禮部員外郎知制誥左遷職方員外郎知黃州

後徙襄州屬感饒大發公廩不足竦又勸州大姓  
使出粟得二萬斛用全活者四十餘萬人又徙安  
州召判集賢院左司郎中拜翰林學士加龍圖閣  
學士遷諫議大夫為樞密副使修國史子安期字  
清卿以父任為將作監主簿召試賜進士出身累  
遷太常博士提點荆湖南道刑獄又為荆西轉運  
使

史嵩之字子由鄞人嘉定十三年進士調光化司戶  
參軍十六年差充湖北路制置司寶慶三年通判  
襄陽府紹定元年以經理屯田襄陽積穀六十八

萬加其官權知襄陽軍二年遷軍器監丞兼權知  
襄陽軍尋兼制置司參議官三十年襄陽屯田成  
轉兩官以堂恩封鄞縣男兼安撫制置參議五年  
加大理少卿兼權刑部侍郎陞制置使知襄陽府  
六年進寶童閣學士兼知鄂州嘉熙元年進華文  
學士京西荆湖安撫制置使兼節制光黃蘄舒條  
奏江淮各三事又陳十難又言江陵非孟拱不可  
守乞勉諭之漢陽受攻嵩之帥師發江陵奏誅張  
可太窳李士達以其棄城也二年黃州圍解拜端  
明殿學士數規執政封奉化侯詔入覲拜參知政

事督視京西荆湖南北江西路軍馬鄂州置司

虞允文字彬甫隆州人紹興二十三年進士通判彭  
州秦檜死陳康伯主戰遣成閔制置京湖允文上  
疏敵兵出上流則荆湖之兵制于前江之兵援于  
後是一軍而兩用之康伯然其說令閔屯武昌奏  
以允文參謀軍事未幾陟兵部尚書湖廣制置使  
為湯思退所沮允文上疏力爭不從金兵復至帝  
始悔之乾道元年召入參知政事三年西歸過郢  
奏築黃鵠山城過襄陽奏築府城五年拜右僕射  
同平章事淳熙元年卒贈大傅謚忠肅子抗孫知

興國軍

辛次膺字起季萊州人政和二年進士調軍父丞除直祕閣湖南提刑先是湖南賊龍淵李朝擁衆數萬據衡之茶陵秦檜不奏乃以見闕處次膺陛辭上曰卿以將母為請朕不得留湖湘風物甚佳且無盜賊職名異恩卒歲當召既抵長沙賊勢方張戍將抽回始悟檜欲陷之即單車趨茶陵擒賊驍將戮之募賊黨毛義龍麟等齎榜諭以朝廷抽回戍將務在招安宜亟降待以不死龍淵李朝相繼降仍請料精銳可得禁旅萬餘次膺笑曰是皆

吾民正當棄兵甲持鋤耰趣令復業秦檜和議成赦書至衡陽次膺極陳其計略曰臣昨在諫列嘗數論金人變詐無常願陛下為宗社生靈深慮檜大怒不報隆興改元同知樞密院事乾道二年卒辛棄疾字幼安歷城人紹興三十二年進士初判建康府乾道六年孝宗召對延和殿棄疾慷慨有大畧遷倉部郎官加祕閣修撰知江陵府兼湖北安撫使召入為大理少卿復出為湖北轉運副使改湖南悉知潭州兼湖南安撫使盜起湖湘棄疾悉討平之遂奏疏曰今朝廷清明比年李全賴文政

陳子明李峒相繼竊發嘯聚殺掠吏民死且不顧  
至煩大兵翦滅由田野之民郡以聚斂害之縣以  
科斂害之吏以乞取害之豪民以兼并害之盜賊  
以剽奪害之民不為盜去將安之夫民為國本而  
貪吏迫使為盜今年剽除明年剽盪譬之木焉日  
刻月削不損則折伏望陛下深思致盜之由講求  
弭盜之申飭州縣以惠養元元為意又以湖南控  
帶二廣與溪峒蠻獠接連復奏疏曰軍政之敝統  
率不二奔走公門苟圖衣食故教閱廢弛平居則  
奸民無所忌憚緩急則卒伍不堪征行至調大軍

千里討捕務負未決傷威損重乞俟廣東摧鋒荆  
南神勁福建左翼別剏一軍以湖南飛虎為名專  
聽帥臣節制庶使夷獠知威望風懾服詔委以規  
畫迺訪馬殷營壘故基起蓋砦柵招補軍伍時樞  
府數沮撓之棄疾行愈力卒不能奪經度費鉅萬  
計棄疾善幹旋事皆立辦議者以聚斂聞降御前  
金字牌棄疾受而藏之出責監辦者期一月飛虎  
營柵成開陳本末繪圖繳進上遂釋然時秋霖幾  
月所司言造瓦不易問須瓦幾何曰二十萬棄疾  
曰勿憂令廂官自官舍神祠外居民家取溝匭瓦



皆具僚屬歎伏軍成雄鎮一方為江上諸軍之冠  
加右文殿修撰

洪适字景伯皓長子也紹興十三年與弟遵同中博  
學宏詞科高宗曰父在遠方子能自立此忠義報  
也秦檜死皓還道卒服闋起知荆門軍應詔上寬  
恤四事輕茶額錢它州代貢禮物闕試闈以復舊  
額蠲官田令不種者輸租乾道元年五月遷翰林  
學士兼中書舍人淳熙十一年卒謚文惠适以文  
學名望遭時遇主自兩制一月入政府又四閱月  
居相位又三月罷政家居十有六年兄弟鼎立于

孫森然

洪彥昇字仲達樂平人登第調常熟尉歷郴州判官  
尋加右文殿修撰進徽猷閣侍制知潭州卒贈太  
中大夫又有洪芻字駒父宣和間監黃州酒務權  
酷賦詩陶然自得靖康中召為諫議大夫

史南曰臣聞諸胡宥言事有大變時有大宜通  
其變然後可為也務其宜然後有功也是故識  
時務者其惟俊傑矣乎苟先幾而為之是之曰  
逆逆天者危後幾而為之是之曰悖悖天者亡  
古之聖人先天而天不違後天而奉天時時之

時義大矣哉宋自藝祖以藩鎮開基太宗以皇  
弟承統宜若夫識夫先天之宜矣然而趙普起  
自刀筆招權納賂徒知金匱之盟為可渝而不  
顧卧榻之鼯睡所當警至景德祥符契丹渡河  
烽火迅速匪寇準扈躍澶淵神武振肅則鐵騎  
未旋金縉已輸自河以北瞻烏其爰止矣向使  
薛居正夏竦猶在相位無益也迨夫徽欽北狩  
於五國高宗南渡于三江宜若識夫後天之宜  
矣然而秦檜返自蘊廬主和罷戰徒知金牌之  
召以戮主將而不忌神器之墟以辱宗社至建

炎德祐兀木渡江乘輿奔竄匪虞允文持節經  
畧則江淮既失吳越尋破自海以南巢燕其焚  
如矣向使李綱宗澤猶在制帥尚可圖也是故  
辛氏之奏議可擬陸贄洪氏之氣節克追蘇武  
其如天何其如時何故未可以成敗論人物也  
贊曰忠臣不私私臣不忠萊公忠憤澶淵樹功  
允文經畧痛憤和戎辛氏昌論惜時弗庸洪氏  
危節返自虜中居正餌丹奚調化工夏史庸碌  
鼎折渥凶寇滅薛弼遇變能通微言彥昇亦有  
可宗

李昉

李沆 李若谷 李迪

李昉字明遠深州人漢乾祐舉進士周顯德間為記室宋初遷中書舍人建隆四年湖湘平詔祀南嶽知衡州太平興國中召為文明殿學士時趙普出鎮同宋琪叅知政事監修國史昉為人和厚多恕不念舊惡小心循謹慕白居易為詩文淺近易曉江南士夫歸朝者多從之游至道二年卒贈司徒謚曰文正子宗諤與楊億齊名為翰林學士

李沆字太初洺州人太平興國五年進士授將作監丞出判潭州召為贊善大夫四年拜翰林學士擢禮部侍郎叅知政事真宗咸平初進同中書門下平章事景德元年卒贈太尉謚曰文靖

李若谷字子淵徐州人舉進士調長社尉天聖初為度支員外郎出知荆南有王家正者挾后姻黨若谷懲之不少貧洞庭賊數掠商賈為致之磔于市擢太常少卿龍圖閣直學士叅知政事卒贈太子太傅謚曰康靖子淑為翰林學士孫壽朋字正老知荆門復圭字審言知荆南

李迪字復古幽州人舉進士第一授秘書省著作郎累官集賢殿大學士仁宗即位貶衡州團練使或

告下謂曰迪若貶死如士論何謂曰異日諸生記  
事不過書天下惜之而已謂賂召為工部尚書資  
政殿大學士卒贈太尉帝篆碑曰遺直之碑子東  
之字公明知荆南孫孝基字伯季知隨州  
史南曰孔子謂大臣以道事君不可則止孟子  
謂大人格君心之非一正君而國定矣觀諸明  
遠之歷事異姓何異于馮道太初之日進災異  
有光于劉向子淵之力拒戚畹上追于鮑宣復  
古之積忤權姦遠同于李膺自夫千載上下觀  
之固可以尚友也已爾贊曰所貴大臣同寅協

恭引

也云

利和業石

李至

李至字

李至

李至

李至字言幾

舉進士

李至

召為著作郎直史

八年拜翰林

李建中得中太平興國

為岳州錄事參

監潭州茶場

登績

紀前

卷

五

李

增者太平興國元  
永州奉行宋初條規邦紀  
不振

李絢字公素邠州人  
進士授大理評事通  
判邠州轉開  
有館職善飲者其人  
城邠州者輔臣以  
乘傳至邵陽戒諸  
兵受約束事  
氣以為實文  
之足羈的

謂不妄語矣

李宥字仲嚴自吳徙青州唐宗室裔也舉進士調火  
山判遷集賢校理出知蘄州歲荒多棄嬰孩宥令  
吏收之計口給穀乳哺煦媪所活甚衆有殺人者  
賂吏匿奸宥得其情論如法擢湖南提刑  
李南公字楚老鄭州人進士及第調浦江尉轉知長  
沙縣有婺婦携兒再嫁七年兒族訟之婦謂非前  
子南公曰歲幾何族人曰九歲問其歲已齒矣斷  
歸其族熙寧中召為龍圖閣侍制又有李仲芳知  
光化軍漢水暴至作石堤以係之民類其利

李周字純之馮翊人舉進士調長安尉遷判施州地  
介群獠罔習牛耕周示以方選謫戍知田者市牛  
墾荒民食充足入京司馬光將薦為御史要之來  
謁周曰君實吾所願見但聞薦而往是呈身御史  
也神宗聞之改集賢殿修撰

李虛已字公受建安人舉進士調沈丘尉城固令提  
屯田員外郎出為湖南提刑復入為諫議大夫所  
著有雅正集又有李伯魯者嘉熙間知岳州有善  
政

李仕衡字天均成紀人進士及第調鄠縣簿彭山令

擢度支員外郎出為荆湖北路轉運使召入為

農卿又有李森者為殿中丞劾侍郎鄧之綱諂王

黼黜知復州

李厚眉州人為沿江制置使開府于鄂其得江漢間  
心入為禮部尚書資政殿學士卒謚文肅

李誠之字茂欽東陽人受學呂祖謙鄉舉大學舍選  
皆第一慶元初為饒州教授改知郢州知金人必  
敗盟大修邊防戰具移知蘄州相視城壁備樓櫓  
築女牆閱廂民兵儲公帑以助兵食嘉定十四年  
金人犯淮南乃分布城守募死士迎擊遇于橫槎

橋破之居數日金人擁衆臨沙河欲度又破之金  
兵大至決湟水焚戰樓又拒退之金移兵要衝攻  
益力圍之數重遂燔木柵誠之出兵禦之又殺其  
將卒數十人奪佩印金人攻西門射卻之俄登望  
樓以窺城使人脅降誠之斬以徇金人卒不得志  
會黃州失守城陷巷戰誠之赴水死子士允力戰  
死事聞封正節侯立廟于蘄賜額曰褒忠

李宗勉字疆父富陽人開禧元年進士歷黃州教授  
進左司諫兼侍講首言均房安蘄光化兵禍甚烈  
然江面可藉以無憂者猶有襄州今又告變矣襄

州失則江陵危長江之險不足恃矣江陵不守則  
事迫勢蹙悔將何及拜殿中侍御史時史嵩之知  
鄂州就鄂建牙宗勉言荆襄殘破淮西正當南北  
之交當置司淮西則脉絡相連可以應援邈在鄂  
渚豈無鞭不及腹之慮然齊安正與武昌對如就  
彼措置則藩籬壯而江面安矣所謂欲保江南先  
守江北也詔侍從兩省臺諫條陳邊事宗勉率合  
臺奏云今郢破荆門又破江陵孤城何以能立誠  
能亟下哀痛之詔以身率先深自貶損服御飲宴  
一從簡儉放後宮浮食之女罷掖庭不急之費止

錫賚絕工役出內帑儲蓄以風動四方語在宋史  
俄擢工部侍郎兼給事中

史南曰臺諫者朝廷之義氣也守令者國家之  
仁氣也有仁以育之則天下懷之不忍忘有義  
以肅之則天下畏之不敢越仁義並用長久之  
術也乃若諸李自至與建中絢與南公以奔監  
出軫民艱宥與虛已周與仕衡以州邑入補君  
闕至于誠之受學名儒試政雄郡宗勉則又嘉  
猷入告直氣上伸可不謂賢乎贊曰郎官應宿  
列侯司城言幾德成出能裕民公素伸嚴入可

告君楚老純之不墜厥名公受天均克禔其身  
乃若誠之師友講明疆父之諱有聲宋庭

王旦

王旦字子明大名華人太平興國五年進士及第授  
大理評事知平江縣舊傳有物恠憑于廨舍旦將  
至前夕守吏聞聲云相君至矣當避去自是遂絕  
趙昌言為轉運使稱其善政以女妻之代還命監  
潭州銀場何承矩典郡薦入為著作佐郎預編文  
苑英華遷殿中丞淳化初王禹偁薦且才任轉運  
使驛召至京命試直史館直宗即位歷中書舍人



翰林學士咸平三年擢工部侍郎叅知政事集賢  
殿大學士監修國史大中祥符初從封泰山為大  
禮使加兵部尚書天禧中進太尉卒贈太師謚曰  
文正子素字仲儀舉進士為侍御史謫知鄂州姪  
質字子舒舉進士累遷荆湖轉運使攝江陵有民  
不能婚者捐俸助之有盜人衣者與之人稱其治  
行擢天章閣侍制又王子融字熙仲文正公曾之  
弟也以吏部郎中知荆南府遷諫議大夫

史南曰臣觀宋名臣錄乃知旦之為相也温厚  
和平鮮格心之學將順容悅之弼違之忠至受

美珠造天書則又有愧于李文靖多矣歐陽倫  
撰神道碑銘曰烈烈魏公相我真宗真廟翼翼  
魏公配食公相真宗不言以躬時有大事事有  
大疑匪小匪筮公為著龜公在相位終日如默  
問其夷狄包裹兵革問其鄉士百官以職問其  
庶民耕織衣食相有賞罰功當罪明相有黜升  
惟否惟能執其權衡萬物之平孰不事君胡能  
必信孰不為相其誰有終天子念功報公之隆

王巖叟

王洙 王安國 王曙 王彬 王襄  
王祖道 王罕 王介 王信  
王佐 王庶 王益 王讓 王師愈  
王居安

王定民 王安中 王巖

王巖叟字彥霖大名入仁宗初置明經科巖叟居首選調樂城簿哲宗立劉摯薦為監察御史湖北諸蠻擾邊靡有寧歲巖叟請專以疆場委唐義問遂自草檄文諭以朝廷敦尚恩信勿徼功賞後遂安輯元祐六年拜樞密直學士

王洙字原叔宋城人舉進士調富川簿召為直講擢天章閣待制修國史會要加龍圖閣出知襄州會州卒叛佐史惶駭洙教練如恒卒無譁者徙知隨州召入為兵部員外郎除史館修撰知制誥與胡

瑗定雅樂改侍講學士謚曰文又有王覲字明

秦州人舉進士為編修貶鼎州團練使

王曙字晦叔河汾人隋東臯子績之後也舉進士調定國推官咸平中遷著作佐郎為諫議大夫樞密直學士寇準為曙婦翁準貶曙謫郢州團練使起為光祿卿知襄州召為工部侍郎叅知政事卒贈太保謚曰文康

王彬固始人淳化三年進士及第調雍丘尉通判筠州擢荆湖提刑徙知潭州

王襄南陽人舉進士崇寧二年自庫部改光祿少師

大觀三年加集賢殿修撰知潭州復知郢州後坐  
金兵圍城青水州安置

王安國字平甫臨川人介甫之從弟也舉茂才異等  
熙寧初登進士第初授武昌節度推官神宗召問  
曰卿學通古今以漢文帝為何如主恐其才不能  
立法對曰三代以來未有也自代入未央定變故  
以德化民幾至刑措才高人一等矣又曰卿兄秉  
政外議謂何曰恨知人不明聚斂太急耳安石不  
悅改崇文院校書

王介字元石金華人紹熙元年進士授太學博士國

史編修上疏論事出知襄陽嘉定六年卒贈寶庫  
閣待制謚曰忠簡子埜字文先嘉定十二年進士  
真德秀竒之辟至潭幕授以理學上言八事駁史  
嵩之之議識者韙之

五信字誠之嚴水人紹興三十年進士授考功郎出  
知永州入奏適者日月五星會軫分野在楚願思  
所以順天應人遂條列七事上之帝覽已加煥章  
閣待制徙知鄂州有星實于其居卒所著有是齋  
集又有王子旣者紹興間知江夏民多懷之

王祖道字若愚福州人舉進士累官端明殿學士知

復州召為刑部尚書大觀二年卒

王罕字師言王珪之季父也以蔭知宜興縣徙知潭州為政務適人情不加威罰有狂婦數訴事前守每叱逐之罕獨引至徐問乃為人妻無子夫死妾子遂專有其家因恚發狂罕為治妾而反其資婦良愈郡人傳為神明墮書襃之徵為光祿卿有王廷珪者政和間知茶陵築城浚隍賑饑弭盜遷敷文閣學士

王鼎字鼎臣舉進士第累遷太常博士吏部司封員外郎出為荆湖制置副使居二年悉意精吏事凡

調發綱吏度漕路遠近定先後為成法官舟舊禁私載兵無以自給盡盜官米為奸鼎為移州縣督償之召入為刑部郎中遷天章閣待制

王師愈字與正金華人師事楊時呂祖謙為學有得舉進士調崇安尉徙知長沙縣民以事至者降意撫循辯治諄切罷征歛毀淫祠散賊黨帥臣張安國薦之遷荆湖北路轉運使紹熙元年卒朱熹銘曰天賦之奇又粹以溫篤行敏學有本有文可謂知之深矣又有王邁字貫之仙遊人嘉定十年進士授潭州推官

王佐字宣子山陰人高宗時廷對第一授平江判官  
入為校書郎累遷吏部員外郎紹興二十九年進  
起居郎出知永州民有冤者盡言無情者畏法暇  
即延見諸生咨詢長老請增解額張浚王十朋薦  
之加直寶文閣知潭州淳熙六年宜章陳峒倡亂  
江華藍山臨武陽山俱騷動佐令馮湛率兵討平  
之誅賊魁李希進工部尚書知臨安淳熙二年卒  
陸游銘曰維宋中興三聖相承公聽並觀以出賢  
能公奮于幽有德有勲知我者天用我者君蹈義  
秉節迄至耆艾山立在庭以道進退大履方建拱

把毓材豈茲棟梁萬牛莫回生或忌之亦嘆其死  
我銘弗誣用論太史

王庶字子尚慶陽人崇寧五年進士調保定令六年  
除湖北安撫使知鄂州上言荊州左吳右蜀利盡  
南海前臨江漢出三川涉大河以圖中原曹操所  
以畏關羽者也上大異之復顯謨閣待制知荆南  
府湖北經略安撫使復直學士七年召為兵部侍  
郎上曰召卿之日張浚已去趙鼎未來此朕親擢  
非左右之助庶頓首謝因奏恢復七疏復以資政  
殿學士知潭州御史胡汝明論庶譏訕朝政道州

安置至貶所卒孝宗思言追復其官謚敏節

王讓初名寧南陽人舉進士崇寧二年以軍器監主簿言事稱旨擢庫部員外郎改光祿少卿大觀三年加集賢殿修撰知潭州

王居安字資道黃巖人淳熙十四年進士授徽州推官累遷工部侍郎會盜起郴州羅世傳倡亂黑風洞湖南騷然命居安為帥調江鄂兵屯衡贛賴以底定又王煥者知武當被賊所執死之

王定民元祐間知衡陽縣修葺學宮撰勸學文以播告多士樂育成材又王時升者昭興周知衡陽治多善狀王濯守沅州置學田以養士王長源守州修浚城池巨寇曹成來攻多方禦之

王益景定間知蘄州遷州治于麒麟山下地獲古錢文又王肅知郴州能除害興利王琪寶元間知沔陽多政績有詩留郡

王安中字履道陽曲人進士及第調瀛州司理參軍累官觀文殿學士責隨州居住又王自中字道南温州人淳熙中舉進士通判郢州王友直字聖益紹興三十一年進士歷徽猷閣直學士出為復州防禦使

王簡字謙仲廬江人乾道五年進士歷鄂州教授光宗即位條上八事遷樞密使寧宗時自江陵徙湖南又王瑞為岳州司法叅軍值歲饑縱囚免死者衆

史南曰古者后稷治農大禹治水伯夷典禮后夔典樂而子孫亦世其官後世則不然如宋之諸王朝迴旋于廊署夕徙倚于郡國豈其才智出聖人上哉繇任之者弗久且專而上無定法受任者弗忠且敬而下無定志故也贊曰王氏多才在野在朝巖叟而下洙信克昭安國而

宰鼎人豪師愈堃佐論事有條庶讓居安視民

不視者安定民熙績庶僚安中益蘭史策寂寥

呂勝已

呂景初

呂希純

呂祐之

呂順浩

趙汝防字微仲京兆人進士及第調馮翊簿永壽令

吳宗立擢監察御史熙寧初自泗華秦三州徙永

興善見宋言陳三說九宜神宗納之元祐元年拜

尚書右丞進中書侍郎封汝郡公與范純仁同心

輔政宣仁后薨上官均攻之出知隨州又貶鄂州

徙安州兄大忠入對哲宗問曰卿第大防安否執

政欲遷嶺南朕獨令處安陸為朕寄聲二三年可  
復相見也大忠泄其語于童淳陞之益力紹聖四  
年連竄舒循虔三州語其子景山曰吾不復南矣  
卒年七十一高宗紹興初贈太師宣國公謚曰正  
愍

呂誨字獻可開封人正惠公端之子也伯父餘慶建  
隆初知襄州潭州遷兵部侍郎知江陵府誨舉進  
士歷殿中侍御史會詔濮王稱親誨與范純仁呂  
大防力諫不聽左遷工部員外郎出知蘄州神宗  
立召為集賢殿修撰加天章閣待制熙寧四年卒

司馬溫公銘曰有宋名臣呂正惠公之孫以忠  
敢言克紹其門位則不究道則不負年則不壽名  
則不朽嗚呼為人臣為人嗣終無愧能底于是可  
謂備矣

呂希純字子進正獻公公著之子也舉進士為太常  
博士轉起居舍人童淳既相以寶謨閣待制出知  
亳州徙歸州復追貶公著而希純責道州安置徽  
宗立欲召之曾布忌之因其請亟以邊趣遣之後  
入崇寧黨籍

呂祐之字元吉鉅野人太平興國初進士授大理評



事至道初為諫議大夫賜金紫出知襄州真宗即位轉給事中復知襄州移鼎州未幾又典襄陽召為工部侍郎拜侍讀學士

呂頤浩字元直齊州人舉進士高宗南渡頤入見陟戶部尚書兼少保同平章事紹興二年桑仲叛于襄陽頤浩議出師身自督戰條上十事除湖南安撫使兼知潭州時郴桂衡盜起頤浩悉討平之加封成國公卒贈太師謚忠穆

呂景初字冲之酸棗人以父蔭試校書郎舉進士歷汝州推官召為侍御史通判江陵府徙知衡州

呂溱字濟叔揚州人進士第一通判亳州召直集賢院出知蘄州入為翰林學士卒贈禮部侍郎

呂祉字安老建陽人宣和初上舍釋褐紹興元年盜起湖南出為荆湖提刑招捕有方進直徽猷閣陟兵部尚書後死于麗瓊之難

呂行中東平人紹興初為零陵令作種愛堂于縣治楊萬里撰記

呂勝已寧宗時為沅州守遇旱禱雨有應勤儉愛民郡人稱之又有呂午為龍陽令誅豪民陶守正威聞南土

史南曰詩稱崧高維嶽維嶽降神禮稱天降時  
雨山川出雲是故觀諸降嶽之神出雲之象而  
賢才出國將昌其徵可知矣然而賢才之生也  
原諸天地繫諸山川其用與舍也則由乎君相  
安石變法斥逐正人而微仲獻可措身無地及  
兀木入寇則號召豪傑而元真安老設策靡遑  
何君子不幸小人之幸哉若夫子進元吉冲之  
濟叔行中勝已皆賢而可書者也贊曰內健外  
順是謂陽明秉正嫉邪是謂忠貞微仲慙直獻  
可端純子進遵訓元吉竭城元直簡諒冲之慎

勤濟叔和易安老樸誠行中勝已遺愛在民

范雍

范純仁

范祖禹

范致虛

范應鈐

范雍字伯純太原人舉進士調洛陽簿累官龍圖閣  
直學士拜樞密副使左遷知安州久之召為吏部  
侍郎知資政殿大學士陟禮部尚書卒贈太子太  
師謚曰忠獻孫奇字中濟唐介薦之徙湖廣轉運  
副使建言梅山蠻為邊患宜經畧之後章惇開五  
溪召為將作監丞

范純仁字堯夫文正公仲淹子也皇祐元年進士調  
武進襄邑二縣令入為殿中侍御史元祐初陟吏

石經四經前 卷四十九  
部尚書出知隨州又貶永州安置失明怡然就道  
居永三年徽宗即位遣中使賜茶藥召為光祿卿  
純仁力疾稱謝加觀文殿大學士卒年七十五謚  
曰忠宣御書碑額曰世濟忠直之碑純粹字德孺  
以蔭補滕縣令元豐中為陝西轉運判官鄂州別  
駕安置後復徵為徽猷閣待制

范祖禹字淳甫華陽人舉進士從司馬光編葺資治  
通鑑居洛十五年光薦為秘書省正字拜翰林學  
士章惇將入相祖禹極言其不可出知陝州言者  
希惇意論其實錄詆誣安置永州范氏自蜀公至

祖禹三世居詞林所著有帝學政典及唐鑑

范致虛字謙叔建陽人舉進士為博士徽宗立除右  
正言出判郢州崇寧初召為起居舍人遷尚書左  
丞高宗幸建康復為資政殿學士出知鼎州行次  
巴陵卒贈銀青光祿大夫

范應鈴字旂叟豐城人開禧元年進士調衡州錄事  
改知崇仁治有善狀真德秀扁其堂曰對越通判  
蘄州改湖南轉運判官兼安撫使時洞獠將何三  
族執令倡亂制帥招之不至應鈴調飛虎軍討之  
禽其魁將時選等事平擢大理少卿

史南曰范祖禹有言君子為名譽而為善則其善必不誠人臣為利祿而效忠則其忠必不盡蓋無所為而為則誠且盡矣乃若伯純之經畧雖不滿于邊疆然而希文之憂樂猶有垂于家法堯夫德孺其取著焉者也淳甫獻納經幃兼叔起居行在拔茅連彙固求貞美其如苞桑覆隍何哉贊曰范氏在宋取多名臣龍圖老子殿上中丞經幄講官起居舍人出膺節鎮入演絲綸六范膚公難乎其名

陳恕

陳堯佐 陳希亮

陳堯咨 陳知微

陳彭年 陳佑

陳世卿 陳從易

陳堯 陳堯 陳堯

陳大素 陳過庭

陳現 陳楠

陳瑄

陳恕字仲言南昌人少為縣吏折節讀書太平興國二年進士解褐大理評事通判澧州恕至清查夙弊郡中稱為神明後召入為贊政大夫同判三司出知江陵大發郡吏姦賊境內稱治淳化四年擢為工部侍郎

陳堯佐字希元其先河朔人徙家于蜀父省華字善則歷知潭州堯佐進士及第調中牟徙下邳遷秘書郎坐言事降監鄂州茶場第堯咨

陳堯咨字嘉謨舉進士第一授將作監丞遷著作佐

郎直史館擢右正言出知荆南召為諫議大夫集賢院學士

陳彭年字永年南城人太平興國中進士雍熙二年調江陵府司理叅軍改江陵主簿歷澧州推官大中祥符間遷龍圖閣直學士

陳世卿字光遠南劍人雍熙二年進士解褐衡州推官大中祥符四年改度支員外郎出為荆湖北路轉運使屬澧州慈利下溪四州蠻人侵境世卿與閣門祗候史方知澧州劉仁霸同領兵討之遂還侵地正經界納所掠漢口千餘復置澧川武口等

砦以控制之嘉獎還朝屢述溪洞利害真宗召對器其材會邵曄被疾乃授世卿秘書少監代之加賜金紫在任九年卒

陳希亮字公弼京兆人天聖八年進士授大理評事授長沙令屬僧海印恃章獻后家據民地捕治之闔邑竦懼郴州有偽券輸官者論死希亮察其非辜出之已而果得其實召為殿中丞坐免富弼薦之起知房州殿侍雷遂禦盜竹山不能戢兵希亮禁之劇賊党軍子園竹山供俸官崔德贊捕之失律希亮下之獄代還民畫像以祠

陳太素字仲華緱氏人舉進士歷大理少卿知襄州  
值歲饑襄人群入巨家掠困粟以食太素貸之詔  
著為例終司農卿

陳知微字希顏高郵人咸平五年進士解褐將作監  
丞出為湖南轉運使又陳軾知黃州時蘇長公為  
團練軾知重之又有陳仲微者嘉禧中舉進士為  
崇陽令累官吏部尚書

陳祐字純益仙井人舉進士元符末以吏部員外郎  
拜右正言論童淳蔡京蔡卞郝隨鄧洵武忤旨編  
管澧州徙歸州復承議郎卒

陳從易字翽夫晉江人舉進士授嵐州推官天禧中  
糾察在京刑獄出為湖南轉運使徙知荆南先是  
寇準貶道州丁謂語曰廬陵之事可以釋憾從易  
曰當以故相待之謂有愧色

陳過庭字賓玉山陰人舉進士調館陶簿宜和二年  
遷禮部侍郎罷知蘄州安置黃州欽宗立改潭州  
後為金人遮留卒謚曰忠肅

陳瓘字瑩中沙縣人中甲科調判湖州徽宗即位召  
為右正言歷司諫忤蔡京崇寧中除名竄郴州宣  
和六年卒靖康初贈諫議大夫謚曰忠肅所著有

尊堯錄

陳規字元則安丘人靖康末金人入寇規為安陸令起兵勤王適寇祝進攻德安府守棄城遁規令射士張立攻之進以砲石鷲車窺城規連戰破之建炎元年加龍圖閣知德安府又寇李友義張世董平合兵圍城規出城與祝進折箭為誓斬董平將黃進事聞除德安漢陽復州鎮撫使又寇桑仲李橫造天橋臨城規率衆禦之砲傷其足不退圍急糧盡士氣益振規令以火牛焚其天橋須臾灰燼召赴行在加顯謨閣學士仍知德安府

陳瓘字子爽嘉興人歷京湖制置使主管機宜文字知德安府加直寶謨閣轉湖南提刑召為右司郎中擢戶部尚書以寶文閣學士知潭州兼湖南安撫使咸淳四年卒謚曰清所著有可齋覆瓿集

陳桷字季壬温州人政和三年進士紹興三年為金部員外郎出知襄陽府時兵燹之餘民物凋瘵桷奏減租金房兵叛遣將平之漢水漂蕩室廬修築隄圻賴以無虞改秘閣修撰

陳麟字子華福州人開禧元年進士累官徽猷閣學士知潭州荆南路安撫使淳祐四年召為兵部尚

書端明殿學士叅知政事七年知樞密院事復出為湖南安撫大使兼知潭州

史南曰虞廷以三考稽績其化也熙焉周官以六廉馭吏其風也皞焉是故帝王風天下而成化功知先務為急而已內而宰相百官之表也外而守令萬民之導也可不慎與有宋諸陳自恕以計相得名而免佐兄弟俱出牧荆鄂世卿以吏治受褒而希亮彭年知微咸涉江湖乃若祐之于澧從易之于道瑾之于柳忤權貴而出牧者也規塏之于安州楠之于襄州韓之于潭

理盤錯而歷試者也惡得而勿書贊曰

維殊有可觀恕為計相國裕以安佐咨彭年漸于磐世卿希亮猛代以寬知微從易守道

選規塏楠韓麗憲無愆祐權之賢莫能居先

劉擘 劉極 劉沆 劉安世 劉師道  
劉述 劉元翰 劉平 劉洪  
劉辛 劉混 劉光祖 劉燮

劉擘字華老東光人嘉祐中擢甲科歷南宮令疏奏安石欲竄之嶺外神宗不聽謫監衡州鹽倉元豐初改集賢校理神宗開天章閣議新官制除禮部紹聖初來之邵周扶論擘變法棄地罪奪職知黃



州再貶蘄州居住將行語諸子曰上用董惇吾且得罪若惇顧國事不遷怒百姓但責吾曹死無所恨正慮意在報復法令益峻柰天下何憂形于色無一言及遷謫意四年坐邢恕之謗貶鼎州團練副使新州安置惟一子從家人涕泣願侍皆不聽至數月以疾卒年六十八厥後孫甲字師文淳熙二年進士累官至度支郎中遷國子院編修官寶謨閣待制知江陵府湖北安撫使甲謂荊州為首吳蜀為脊高保融據江流渚之為海太祖常令決去之蓋保江陵之要害也即因遺址浚築亘四十

里移知廬州

劉拯字彥修南陵人登進士第元豐中為監察御史蔡京編元祐黨籍拯歷陳漢唐黨禍京怒出拯知蘄州張商英入相召為吏部尚書又劉季喆豫章人政和初知臨武有去思碑

劉沆字冲之永新人天聖八年進士授大理評事直集賢院出知蘄州有巨姓尹氏偽券侵田沆鞫奪之人稱其明時湖南徭數叛徙知潭州兼安撫使沆發兵至桂陽招降二千餘人使散居所部蠻酋皆命以官已而賊復出殺裨將歸元坐降鄂州

劉安世字器之魏人舉進士從司馬光游遷起居舍  
人諫議大夫有旨暫罷講筵安世上疏極論語在  
宋史章惇用事深嫉之貶新州徽宗立移衡州及  
鼎州曾布又甚之不使入朝蔡京復相謫峽州  
劉師道字損之開封人雍熙二年進士調和州推官  
擢殿中丞直宗即位出為荆湖發運使四年入奏  
拜樞密直學士徙知潭州長沙當湖嶺要會剖煩  
折滯案無留牘歲滿加樞密直學士留任七年卒  
又劉愚為安鄉令平賦賑饑修范文正祠立常平  
倉民甚德之

述字孝叔湖州人舉進士為御史臺簿累官都官  
員外郎胡宿言其沉靜有守特遷兵部員外郎改  
荆湖南北京西路轉運使神宗立召為侍御史  
劉元瑜字君玉河南人舉進士補武陽簿改秘書省  
知郢州入為監察御史復以天章閣待制知潭州  
徭人數寇元瑜使州人楊瑜入梅山說酋長聽命  
因厚犒之籍以為民凡千二百戶徙桂州後坐在  
潭州擅補畫工易元吉為助教降知隨州徙襄州  
劉湜字子正徐州人舉進士為澶州推官再調湖南  
節度推官改秘書省著作佐郎拜監察御史王德

用自隨州召還或言其有反相湜保其無他拜殿  
中侍御史又劉芮字駒父吉州人紹興十八年為  
永州司理參軍疏駁疑獄入為大理司直又劉審  
瓊知茶陵罷火政以節民役劉子邁知茶陵祛寇  
盜其酋民居人咸稱之

劉平字士衡祥符人進士及第補無錫尉徵拜監察  
御史出知襄州仁宗立遷殿中侍御史改荆湖制  
置發運副使景祐元年拜神龍衛都指揮永州防  
禦使又劉清之知衡州多善政民祠之又劉玠建  
炎中金人陷潭州死于陣張栻撰記

劉珙字共父崇安人資政殿鞞之孫徽猷閣子羽之  
長子也子羽字彥修以集英殿修撰知鄂州珙幼  
從叔父子翬學舉進士主管南嶽廟乾道元年湖  
南旱饑宜童民李金為亂入道州桂陽犯九郡朝  
廷憂之以珙知潭州湖南安撫使入境將發兵討  
之移書制使沈介請以便宜出師介即遣田寶楊  
欽以兵至珙犒賜過厚軍士感奮檄諸軍受節制  
令募賊徒相捕斬欽與寶連戰破賊追至奔山賊  
黨曹彥黃珙執李金以降上賜璽書褒之拜翰林  
學士知制誥服闋再知潭州過關極論時高進賢

政殿大學士湖北茶寇致千人入境珙曰此非必  
死之寇緩之則散而求生急之則聚而致死揭榜  
諭之珙乃遣兵戒曰來毋亟戰去毋窮追不去者  
擊之耳盡擒以歸淳熙二年進觀文殿大學士珙  
為人機鑒精明議論英發其在州郡治平聽察修  
飾嶽麓書院屬張栻告以正學在荊州時北虜亦  
使謀者訶其家世卒封彭城侯謚曰忠肅朱熹銘  
曰昔在陽九失我秦平東游三紀汴洛羶腥帝始  
靈承俯仰顧嘆曰汝在廷孰抗斯難爰有俊哲三  
世一心忠精義烈思遠憂深沫血奮辭曰此讎耳

乃盟乃藩賴得無泚不有豪聖孰慮孰圖孰秉武  
節以行天誅帝曰俞哉予欽汝論既啓干中蓋布  
于外澤流威憚汝則來歸卒輔吾志以究汝為四  
鎮十年帝適西顧彼皇顛蒼胡奪之遽

劉光祖字德修簡州人舉進士授劔南推官淳熙五  
年召對論恢復事請以太祖用人為法光宗即位  
遷殿中侍御史出為湖南運判主管王局觀趙汝  
愚既罷相奪職謫居房州久之許自便侂冑誅召  
除右文殿修撰知襄陽府改京湖制置使加寶謨  
閣直學士卒謚曰文節又劉頴 漳州判 上佐


為帥類多規正

劉宰字平國金壇人紹熙元年進士調江陵尉時巫風為盛宰令保伍相糾正改業為農歲旱賑荒多所全活與吏卒同䟽食水飲去官惟篋藏趙師秀酬倡詩而已尋監南岳廟江淮制置使黃度辟之入幕宰辭曰君命召不往矧可出耶端平元年加寶謨閣所著有漫塘集又劉理為沅州守行釋菜禮撥沒官以養士又劉應龍字漢臣高安人嘉禧二年進士授零陵簿

劉夔字道元高安人舉進士累遷屯田員外郎擢侍

御史甘以蠻唐和寇邊以右諫議大夫知潭州兼湖南安撫使舉兵擊之破其巢穴蠻遁州境獲安史南曰臣讀畢命至道有升降政由俗革未嘗不嘆有周之治之熙明也是故表厥宅里樹之風聲俾為善者知所勸殊厥井疆俾克畏慕俾為惡者知所懲然後澤潤生民而無疆惟休爾矣使非畢公忠誠弼亮正色率下民能保釐若是哉茲觀于有宋諸劉而知畢公之道未泯也自擊之獨立不黨極之直陳黨禍安右之䟽視

進至光祖則又極論為學禁而皇明比



嚴矣自沉之出平臺冠道之割  
 元瑜之招降酋帥至珙則又不敷懷柔之政而  
 臯謨明允之訓乎矣自湜之保全功臣平之防  
 禦炎微罕之洗濯巫風至夔則又遠振神武之  
 威而方叔顯允之名著矣贊曰諸劉哲髦保又  
 宋室昌論朝堂姦黨股栗丕冒海宇善良懷德  
 擊則罔黨直躬獨立安世師道守貞不屈珙則  
 有猷光輝篤實元瑜光祖嘉謨徽奭述平宰夔  
 州郡敷歷庶績登明詞林有奕

通紀卷之四十九

